

मर्कूसं च्वःगु भिंगु खँ म्हसीका

मर्कूसं थ्व सफुलिइ पुलांगु नियमया अगमवक्ता यशैयां याःगु अगमवाणी कथं प्रभु येशू झाःगु व वयक्ःयात लँ छिंका बीम्ह यूहन्ना वःगु खँ न्ह्यथनातःगु दु। मर्कूसं च्वःगु सुसमाचारय् “भिंंगु खँ परमेश्वरया काय् येशू खीष्टया बारे खः” धकाः नं न्ह्यथनातःगु दु। थुकी येशूयात अधिकार दुम्ह मनूकथं न्ह्यब्वयातःगु दु। वयक्ःयागु अधिकार, वयकलं स्यनेकने यानादीगु खं, वयकलं भूतआत्मातयत ख्यानाः छ्वयादीगुलि व वयकलं मनूतयत पापं क्षमा यानादीगुलि क्यं। येशू थःत “मनूया काय्” धकाः धयादी – वयक्ः मनूतयत इमिगु पापं मुक्त यायेत थःगु जीवन बीत झाःगु खः।

मर्कूसं येशू यानादीगु ज्याखँयात वयकलं स्यनादीगु खँ स्वयाः अप्वः बःबियाः न्ह्यब्वयातःगु दु। मर्कूसं येशूया बारे थुपि निता खँ नं न्ह्यब्वयातःगु दु।

१. येशू मनूतयसं ताःइलनिसें पियाच्चंम्ह मसीह खः।
२. येशू परमेश्वरया दुःख फइम्ह सेवक खः।

थ्व सफुलिइ बप्तिस्मा बीम्ह यूहन्नायागु खँ व येशू बप्तिस्मा कयादीगु अले वयक्ःयात जाँचय याःगु खँ चिहाकयक् जक न्ह्यथनातःगु दु। येशू स्यनेकने यानादीगु व ल्वय् लाय्कादीगु खँ धाःसा ताःहाकयक् च्वयातःगु दु। वयक्ः यरूशलेमय् झाःगु अले अन वयक्ःया विरोधीतयसं वयक्ःयात कूसय् यख्खानाः स्यायेत ताःलाःगु खँ न्ह्यथनातःगु दु। येशूयात कूसय् यख्खायाः स्याःगु अयनं हानं म्वानावःगु थ्व सफूया मू खँ खः।

मर्कूस पत्रसयात ग्वाहालि याइम्ह खः। वं थ्व सफू रोमय् पत्रसयात मृत्यु दण्ड बी धुनेवं पत्रसं स्यनेकने याःगु खँ लुमंकाः च्वःगु खः। रोमया मण्डलीइ यहदीत नापनापं यहदीमखुपि नं यक्व मुनीगु खः। उबलय् मेपिन्सं इमित तसकं दुःखकष्ट बियाच्चंगुलि मर्कूसं थ्व सफू इमित साहस बीत च्वःगु खः। मर्कूस प्रभु येशूया शूर्या झिंनिम्ह चेलात मध्ये छम्ह मखु।

मर्कूसया सफू ई.सं. ५० निसं ६८ या दथुइयागु छगू इलय् च्वःगु जुइफु।
धलः पौ

सुसमाचारया न्ह्यखँ १:१-१३

गालीलिय येशूयागु ज्या १:१४-१:५०
 गालीलं येशू यरूशलेमय् झाःगु १०:१-५२
 येशू यरूशलेमय् व अन लिक्क दुगु बेथानियाय् ११:१-१५:४७
 येशू सिनाः म्वानाझाःगु १६:१-८
 म्वानावःमह प्रभु खनेदुगु व स्वर्गय् झाःगु १६:१-२०

मर्कस

बप्तिस्मा बीम्ह यूहन्नां स्यनेकने याःगु

मती ३:१-१२; लूक ३:१-१८; यूह १:१९-२८

1 परमेश्वरया काय् येशू ख्रीष्टयागु भिंगु खँ थुकथं शुरु जुइ।

2 यशैया अगमवक्तां थथे च्वयातःगु दु -

“परमेश्वरं धयादिल -

‘स्व, जिं जिम्ह दूतयात

छंगु न्ह्यः न्ह्यः छवयाबी।

वं हे छंगु निति लँ दयकाबी।’ ☆

3 मरुभूमिइ छम्ह मनु

थथे धकाः हाला वइ -

‘परमप्रभुया लँपु तयार या,

वयकःयात लँ छिकाब्यु।’ ” ☆

4 अले बप्तिस्मा बीम्ह यूहन्ना मरुभूमिइ खनेदय्कः वल। वं पापयागु पश्चाताप यानाः परमेश्वरपाखें क्षमा कायेत बप्तिस्मा का धकाः न्यंकाजुल।

5 यहूदियायागु फुक्क गां व यरूशलेमयापि सकल मनुत यूहन्नायाथाय् वल। अले यूहन्नां थःगु पाप मानय याःपिं फुक्कसित यर्दन खुसिइ बप्तिस्मा बिल।

6 यूहन्ना ऊँटया सँयागु लं फिनाजुइम्ह व जँय् छेंगूयागु जनी चिनाजुइम्ह खः। वं क्वःबुईचा व गुँ कस्ति जक नइगु खः। ☆

7 वं इमित थथे धयाजुल - “जिगु लिपा जि स्वयाः तःधंम्ह झायाच्वंगु दु। जि ला क्वछुनाः वयकःयागु लाकां पुतु फ्यनेत तर्क मल्वः।

8 जिं ला छिमित लखं बप्तिस्मा बियाच्चना। वय्कलं छिमित पवित्र आत्मां बप्तिस्मा बियादी।”

येशू बप्तिस्मा कयादीगु व वय्कःयात जाँचय् याःगु

मत्ती ३:१३-४:११; लूक ३:२१-२२; ४:१-१३

9 अबलय् येशू गालीलयागु नासरतं झाल, अले यूहन्नां वय्कःयात यर्दन खुसिइ बप्तिस्मा बिल।

10 लखं थाहां झाःबलय् वय्कलं स्वर्ग चालावंगु व पवित्र आत्मा सुकुभतु जुयाः थःपाखे कुहां वयाच्चंगु खन।

11 अले स्वर्ग थथे धकाः धयाहःगु सः ताल – “छ जि यःमह काय् खः। छ खनाः जि तसकं लय्ताः।”☆

12 परमेश्वरयागु आत्मां वय्कःयात उबलय् हे मरुभूमिइ छवयादिल।

13 अन शैतानं पिइन्हू तक वय्कःयात जाँचय् यात। वय्कः गुँपशुतनापं च्वनादिल, स्वर्गदूततय्सं धाःसा वय्कःयागु सेवा याना हे च्वन।

प्यमह न्या लाइपिन्त सःतादीगु

मत्ती ४:१२-२२; लूक ५:१-११

14 यूहन्नायात ज्वने धुंकाः येशू भिंगु खँ न्यंकुं न्यंकुं गालीलया झायः थथे धयादिल –

15 “ई जुइ धुंकल, परमेश्वरयागु राज्य न्ह्यःने थयने धुंकल। पश्चाताप या, भिंगु खँय् विश्वास या।”☆

16 गालील समुद्र सिथय् चाःहिला च्वंबलय् वय्कलं न्या लाइपि निम्ह मन् सिमोन व वया दाजु अन्दियासयात जाः हानाच्चंगु खन।

17 अले इमित धयादिल – “जि नाप वा, जिं छिमित मन् लाइपि यानाबी।”

18 थ्व न्यनेवं इपिं थथःगु जाः त्वःताः वय्कः नाप वन।

19 अनं भचा उखे वय्कलं जब्दिया निम्ह काय् याकूब व वया किजा यूहन्नायात नांचाय् च्वनाः पुलांगु जाः ल्हनाच्चंगु खन।

20 वय्कलं इमित नं सःतादिल। न्यनेवं इपिं थः अबु जब्दीयात ज्यामितनापं नांचाय् त्वःताः वय्कः नाप वन।

भूत दुब्युमह मन्यात लायकादीगु

लूक ४:३१-३७

21 अले वय्कःपि कफर्नहुमय् झाल। अन वय्कलं विश्रामबार खुन्हु धर्मशास्त्र स्यनीगु छैय् झायाः स्यनेकने यानादिल।

22 वय्कःयागु खँ न्यनाः फुक्क मनूत छक्क जुल। छायाधाःसा वय्कलं शास्त्रीतयसं थें मखु, बरु अधिकार दुम्ह मनुखं थें स्यनादिल।*

23 अबलय् अन भूत दुब्ब्यूम्ह छम्ह मनू वयाः थथे धकाः हाल –

24 “हे नासरतयाम्ह येशू, छि जिमिथाय् झायेमाःगु हे छाय्? छि जिमित नाश यायेत झायागु ला? जिं छितः म्हस्यू, छि परमेश्वरया पवित्रम्ह मनू खः।”

25 वय्कलं वयात थथे धकाः ब्वःबियादिल – “सुम्क च्वाँ। वयागु म्हां पिहां वा।”

26 भूतं व मनुयात फ्यारा फ्यारा खाकल। अले तसकं हालाः वया म्हां पिहां वल।

27 थ्व खनाः फुक्क मनूत अजू चाल। अले थःथवय् थथे खँ ल्हात – “थ्व छु जूगु? थ्व ला अधिकारं जाःगु न्हगु खँ खः। वय्कःयागु खँ ला भूतं नं न्यं।”

28 थुकिं यानाः वय्कःयागु नां गालीलयागु फुक्क थासय् बयबय् जुल।

यक्व मनूतय्त लाय्कादीगु

मन्ती ८:१४-१७; लूक ४:३८-४१

29 धर्मशास्त्र स्यनीगु छैनं पिहां झायाः वय्कः याकूब व यूहन्ना नाप सिमोन व अन्द्रियासयागु छैय् झाल।

30 सिमोनया ससःमां ज्वरं म्हंमफय्का च्वन। इमिसं थ्व खँ वय्कःयात धाल।

31 वय्कलं अन झायाः वयात ल्हाः ज्वनाः थन, अले वयागु ज्वर क्वलाना वन। अले वं दना वनाः वय्कःपिन्त नके त्वंके याः जुल।

32 बहनी निभाः बीधुंकाः अन च्वांपिन्सं उसाँय् मद्दुपिन्त व भूत दुब्ब्यूपिन्त वय्कःयाथाय् हल।

33 शहरय् च्वांपि दक्व मनूत लुखाय् मुंवल।

34 वय्कलं तसकं म्हंमफय्का च्वांपिन्त व तःतामछि ल्वय् दुपिन्त लाय्कादिल। वय्कलं यक्व भूततय्त पितिनादिल। भूततय्सं वय्कःयात म्हस्यूगुलि वय्कलं इमित नवाके मब्यू।

येशू प्रार्थना यानादीगु

लूक ४:४२-४४

35 येशू सुथ न्हापां खिउँसे च्वांबलय् हे दनाः सुं मद्दुगु थासय् झायाः प्रार्थना यानादिल।

* 1:22 १:२२ मन्ती ७:३८-२९

- 36 सिमोन अले वनापं दुपिन्सं वयकःयात माः जुल।
 37 अले वयकःयात लुइकाः थथे धाल – “फुक्कसिनं छितः मालाच्चंगु दु।”
 38 वयकलं इमित धयादिल – “लिक्क लिक्क लाःगु मेमेगु गामय् नं वनेनु, जि अन नं स्यनेकने यायेमाः, छायाःसा जि थ्व हे ज्या यायेत वयाम्ह खः।”
 39 अले गालीलया फुक्क धर्मशास्त्र स्यनीगु छैय् न्यंकु न्यंकु व भूत दुब्युपिन्त लाय्केगु ज्या यायां चाःहिलादिल।*

कोहियात लाय्कादीगु

मत्ती ८:१-४; लूक ५:१२-१६

- 40 छम्ह कोह्मिह मनुखं येशूयाथाय वयाः पुलि चुयाः थथे बिन्ति यात – “प्रभु, छिं यय्कादीसा जितः शूद्र यानादी फु।”
 41 येशू माया यानाः थःगु ल्हातं वयात थियाः धयादिल – “ज्य्, छंगु ल्वय् लाया वनेमा।”
 42 थुलि धाय्वं हे व कोह्मिह मनुया ल्वय् लाया वन अले व शूद्र जुल।
 43 वयकलं ख्याच्चः बियाः धयादिल –
 44 “स्व, थ्व खँ सुयातं कनादी मते। पुजाहारीयाथाय वनाः छं थःगु ल्वय् लाःगु क्यँ। अले फुक्कसित क्यनेत मोशां धाःथें शूद्र जुइत माःगु ज्वलं छायाब्यु।”*
 45 व मनुखं धाःसा वनाः फुक्क थासय् थ्व खँ बयबय यानाबिल। थुकि यानाः येशूयात शहरय् वयेत थाकुल अले वयकः सुं मदुथाय् च्वंझाल। मनुत धाःसा प्यखेरं वयकःयाथाय् वयाच्चन।

2

पक्षवातं कःम्ह मनुयात लाय्कादीगु

मत्ती ९:१-८; लूक ५:१७-२६

- 1 छुं दि लिपा वयकः कफर्नहुमय् लिहां झाल। वयकः छैय् झाल धयागु न्यनाः
 2 यक्व हे मनुत वयकःयाथाय वल। थुकि यानाः अन लुखाया पिने तक नं च्वनेत थाय् मन्त। अन येशू परमेश्वरयागु वचन न्यंकादिल।
 3 उबलय् अन पक्षवातं कःम्ह छम्ह मनुयात प्यम्ह मनुतय्सं क्वबिया हल।

* 1:39 १:३९ मत्ती ४:२३; ९:३५

* 1:44 १:४४ लेवी १४:१-३२

4 अन ग्वाः ग्वाः मनूत दुगुलि इपि येशूयाथाय् वने मफुत। अले इमिसं येशू च्वनाच्वंगु थाय्या च्वसं च्वंगु पौ प्वलाः पक्षवातं कःम्ह मनूयात लासानापं क्वय् क्वछवत।

5 इमिगु थज्याःगु विश्वास खनाः वय्कलं ल्वगियात धयादिल – “छं याःगु पाप क्षमा जुल।”

6 उबलय् अन शास्त्रीत नं दुगु जुयाच्वन। इमिसं मनं मनं थथे धाल –

7 “छु धयाच्वंगु थ्व मनूखं? थ्वं ला परमेश्वरयात हे क्वह्यंकाच्वन। परमेश्वरं बाहेक मेपि सुनां पाप क्षमा याये फु?”

8 इमिगु मनय् च्वंगु खँ थर्थे थःगु आत्माय् थुइकाः वय्कलं इमित धयादिल – “छिमिसं छाय् मभिगु मतिइ तथा जुयागु?”

9 थ्व मनूयात ‘छंगु पाप क्षमा जुल’ धायेगु अःपु ला कि ‘लासा ज्वनाः दना हँ’ धायेगु अःपु?

10 संसारय् च्वंपिनिगु पाप क्षमा यानाबीत मनूया काय्याके अधिकार दु धयागु खँ छिमिसं सीकि।” थुलि धयाः वय्कलं पक्षवातं कःम्हयूसित थथे धयादिल –

11 “जिं छन्त धाये – दनाः थःगु लासा ज्वनाः छँ हँ।”

12 थुलि धायेवं हे व मनू जुस्क्क दनाः थःगु लासा ज्वनाः फुक्कसिगु न्ह्यःने पिहां वन। अन च्वंपि फुक्कं छक्क जुल। अले थथे धकाः परमेश्वरयात तःधंकल – “जिमिसं ला थथे जूगु गुबलें हे मखंनि।”

येशू लेवीयात सःतादीगु

मत्ती ९:९-१३; लूक ५:२७-३२

13 वय्कः हानं गालील समुद्र सिथय् झायादिल। थन नं मनूत ग्वाः ग्वाः मुंवःगुलि वय्कलं इमित स्यनादिल।

14 लँय् वयाच्वंबलय् वय्कलं लेवी धाःम्ह अल्फयसया काय्यात कर कायेगु अड्डाय् च्वनाच्वंगु खनाः धयादिल – “जि नाप वा।” अले व दनाः वय्कः नाप वन।

15 वय्कः लेवीया छँय् भ्वय् नयेत फेतुनादीबलय् कर काइपि व पापीत नं वय्कः व वय्कःया चेलात नाप नयेत फ्यतुत।

16 वय्कः पापीत व कर काइपि मनूत नाप च्वनाः नयाच्वंगु खनाः फरिसी व शास्त्रीतयसं वय्कःया चेलातय्के न्यन – “थज्याःपि मनूतलिसे च्वनाः छाय् नयाच्वंगु व?”

17 थ्व न्यना: वय्कलं इमित धयादिल – “छुं मजूपिं मनूतयत् डाक्टर माली मखु, ल्वय् दुपिन्त जक माली। जि धर्मीतयत् मखु बरू पापीतयत् सःतः वयागु खः।”

अपसं च्वनेगु खँ

मती १:१४-१७; लूक ५:३३-३९

18 यूहन्नाया चेलात व फरिसीत अपसं च्वंगुलिं सुं मनूत वया: वय्कःयाके न्यन – “बपिस्मा बीम्ह यूहन्नाया चेलात अपसं च्वं, फरिसीत अपसं च्वं, छिकपिनि चेलात जक छाय् मच्वंगु?”

19 वय्कलं इमित धयादिल – “ब्याहा याइम्ह मिजंनापं च्वनाच्वंतले जन्त वःपिं मनूत घां लानाच्वनी ला? ब्याहा याइम्ह मिजं इपिंनापं दतले इपिं अपसं च्वनी मखु।

20 अथेसां छन्हू ब्याहा याइम्ह मिजंयात यकितिनि। अले जक इपिं अपसं च्वनी।”

21 “पुलांगु वसतय् सुनानं न्हगु कापतं पकीं मखु, छाय्धाःसा न्हगु कापतं पुलांगु कापःयात साला काइ, अले इन तःकू जुइक गुनावनी।

22 “अथे हे सुनानं पुलांगु छेंगूयागु म्हिचाय् दाखमघ तइ मखु, छाय्धाःसा पुलांगु छेंगूयागु म्हिचाय् दाखमघ तल धाःसा म्हिचा हे गुनावनी, अले दाखमघ वाइ, म्हिचा नं स्यनी। थथे मयासें दाखमघ न्हगु म्हिचाय् तल धाःसा नितानं बचय् जुइ।”

विश्रामबारयागु खँ

मती १२:१-८; लूक ६:१-५

23 छन्हू विश्रामबार खुन्हू वय्कः चेलात नाप छवबया लँ जुयाः झाया च्वंबलय् वय्कःया चेलातयसं छवमा स्वहायकाः नयेत स्वल।☆

24 थ्व खनाः फरिसीतयसं वय्कःयात धाल – “स्व, छिमि चेलातयसं विश्रामबार खुन्हू छु याये मज्यू धाःगु खः व हे यानाच्वन।”

25 वय्कलं लिस्: बियादिल – “दाऊदं थः व थःनाप वःपिं मनूतय् नये पित्याःबलय् माःकथं छु यात धयागु खँ छिमिसं ब्वनागु मदु ला?”

26 गुकथं दकलय् तःधंम्ह पुजाहारी अबियाथारया पालय् परमेश्वरया छेंय् दुहां वनाः अन छायातःगु मरि नल, अले थःनाप वःपिन्त नं नकल। परमेश्वरयात छायातःगु मरि ला पुजाहारीतयसं बाहेक मेपिन्सं नये हे मज्यू।”☆☆

☆ 2:23 २:२३ व्य २३:२५

☆ 2:26 २:२५-२६ १ शमू २१:१-६

☆ 2:26 २:२६ लेवी २४:९

- 27 वय्कलं इमित हानं धयादिल – “विश्रामबार मनूतयगु निति दय्कातःगु खः, मनूत विश्रामबारया निति दय्कातःगु मखु।
28 थथे जूगुलि मनूया काय् विश्रामबारया नं प्रभु खः।”

3

ल्हाः गंम्ह मनू

मन्ती १२:१-१४; लूक ६:६-११

- 1 येशू हानं धर्मशास्त्र स्यनीगु छैय् झाल। अन छम्ह ल्हाः गंम्ह मनू दुगु जुयाच्वन।
2 विश्रामबार खुन्हु जूगुलि वय्कःया विरोधीतयसं थ्वखुन्हु ल्हाः गंम्ह मनूयात लाय्की ला कि धकाः चिवा कयाच्वन।
3 वय्कलं ल्हाः गंम्ह मनूयात धयादिल – “न्ह्यःने वा।”
4 वय्कलं इमिके थथे धकाः न्यनादिल, “विश्रामबार खुन्हु भिं यायेगु ज्यू ला कि मभिं यायेगु ज्यू, स्यायेगु भिं ला कि म्वाकेगु भिं?” तर इपिं छुं हे मधासे सुम्क च्वनाच्वन।
5 इमिगु नुगः छाःगु खनाः नुगः मछिंकाः तमं इमिथाय् मिखा ब्वयाः व मनूयात धयादिल – “ल्हाः तप्यंकी।” अले वं ल्हाः तप्यंकल। थथे गंगु ल्हाः लाल।
6 फरिसीतयसं अनं वनाः हेरोदया मनूत नाप वय्कःयात स्यायेगु म्बसाः म्वल।

यक्व मनूत येशूया ल्यूल्यू वःगु

मन्ती ४:२३-२५; लूक ६:१७-१९

- 7 अनं येशू थः चेलात नाप समुद्र सिथय् झयादिल। गालीलं व यहदियां ग्वाः ग्वाः मनूत वय्कःया ल्यूल्यू वःगु दु।
8 वय्कलं अजू चायापुगु ज्या यानादिल धयागु न्यनाः यरूशलेम, इदुमिया, यर्दन पारिइ, टुरोस व सीदोनया थुखे उखे च्वपिं यक्व हे मनूत वय्कःयाथाय् वल।
9 वय्कलं थः चेलातयत् धयादिल – “जितः चिचाधंगु नांचा छगु हति, मखुसा ला मनूतयगु हुलं जितः काकातइ।”
10 यक्वसिगु ल्वय् लायका ब्यूगुलि वय्कःयात थीत यक्व हे उसाँयमदुपिं मनूत घ्वान्तुमदुघ्वानाः वयेत सनाच्वन।
11 भूतआत्मां वय्कःयात खनेवं वय्कःया न्ह्यःने क्वपुसां पुयाः थथे धकाः हाल – “छि परमेश्वरया काय् खः।”
12 अले वय्कलं थ्व खँय् सुयातं छुं धाये मते धकाः इमित उजं बियादिल।

☆ 3:10 ३:१-१० मर्क ४:१; लूक ५:१-३

झिनिम्ह प्रेरितत ल्ययादीगु

मन्ती १०:१-४; लूक ६:१२-१६

- 13 पहाडय् थाहां झाया: वयकलं थ:त मा:पिं मनूतयूत स:तादिल। इपिं अन वन।
 14 वयकलं झिनिम्हयसित थ:नाप तयेत व भिंगु खँ न्यके छवयेत ल्ययादिल।
 15 इमित भूतआत्मायात पितिनाछवयेगु अधिकार नं बियादिल।
 16 झिनिम्ह थुपि हे ख: – सिमोन, गुम्हयसिगु नां वयकलं पत्रुस तयादिल,
 17 जब्दिया काय् याकूब व याकूबया किजा यूहन्ना, गुम्हयसित वयकलं
 बोअनर्गेस धका: नां तयादिल, (बोअनर्गेसया अर्थ तंगुलु ख:),
 18 अन्द्रियास, फिलिप, बारथोलोमाइ, मन्ती, थोमा, अल्फयसया काय् याकूब,
 थेदियस, सिमोन कनानी
 19 व येशूयात धोखा ब्यूम्ह यहदा इस्करियोत।

येशू व भूततय् जुजु

मन्ती १२:२२-३२; लूक ११:१४-२३

- 20 अले येशू वयक:या चेलात नाप छँय् झाल। अन नं यक्व मनूत मुंव:गुलि
 वयक:पिनि नये तक नं लिमलात।
 21 वयक:या थ:ला:पिन्सं वयक: वें जुल धका: वयक:यात व्वनायकेत का वल।
 22 यरूशलेमं व:पिं शास्त्रीतय्सं थथे धाल – “भूततय् जुजु बालजिबुलं शक्ति
 बियात:गुलि थ्वं भूतयात पितिनाछवये फुगु ख:।”☆
 23 थथे धा:गुलि वयकलं मनूतयूत स:ता उखान छुना: इमित थथे धयादिल –
 “शैतानं शैतानयात गथे पितिने फइ?
 24 गुगुं नं देशय् थ:थवय् हे ल्वापु जुल धा:सा व देश स्यनावनी।
 25 गुगुं नं छँय् थ:थवय् ल्वापु जुल धा:सा व छँ स्यनावनी।
 26 अथे हे शैतानं शैतानयात स्यंकेत स्वल धा:सा थुपि निम्हं नाश जुयावनी।
 27 सुनानं छम्ह तसकं हे बल्ला:म्ह मनूया छँय् खुयायकेत न्हापां व मनूयात नि
 चीमा:, अले तिनि खुयायके फइ।
 28 “जिं छिमित धात्थें धाये – मनूतय्सं न्हाथें ज्या:गु त:धंगु पाप या:सां क्षमा
 जुइ,
 29 पवित्र आत्मायात मभिंका: खँ ल्हाइपिन्त धा:सा गुबलें हे क्षमा दइ मखु।
 थज्या:पिं मनूत सदां दोषी ठहरय् जुइ।”☆

30 वय्कःयाके भूत दुबिनाच्चंगु दु धकाः शास्त्रीतय्सं धाःगुलि थथे धयादीगु खः।

येशूया मां व किजापिं

मत्ती १२:४६-५०; लूक ८:१९-२१

31 उबलय् हे येशूया मां व किजापिं वय्कःयाथाय् वल। इमिसं पिने हे च्वनाः वय्कःयात सःतके छवयाहल।

32 वय्कःया जःखः च्वनाच्चंपिन्सं धाल - “स्वयादिसँ, छिकपिनि मां व किजापिं छितः नापलायेत वयाच्चन।”

33 वय्कलं इमिके न्यनादिल - “जिमि मां व जिमि किजापिं सु खः?”

34 अले अन छचाःखेलं फ्यतुना च्वंपिन्त स्वयाः धयादिल - “मां धाःसां, किजापिं धाःसां थुपि हे खः,

35 छायाधाःसा सुनां परमेश्वरं धाःथें याना जुइ, व हे जिमि किजा, जिमि केहें, व जिमि मां खः।”

4

पुसा हलिम्हयसिगु उखान

मत्ती १३:१-९; लूक ८:४-८

1 येशू समुद्र सिथय् च्वनाः मनूतय्त स्यनेकने यानादिल। मनूत ग्वाः ग्वाः वःगुलि वय्कः नाचाय् थाहां झाल, मनूत जक समुद्र सिथय् तुं च्वनाच्चन।*

2 वय्कलं इमित उखान कँकं यक्व खँ स्यनादिल -

3 “न्यँ, छम्ह मनू बुँइ पुसा हः वन।

4 वं पुसा हःबलय् गुलि गुलि पुसा लँय् नं लात, अले इंगःतय्सं वयाः नयाबिल।

5 अले गुलि पुसा ल्वहंलि दुथाय् लात। भचा भचा जक चा दुगुलि अन लाःगु पुसा याकनं बुयावल।

6 निभाः त्वःबलय् अन बुयावःगु मा सुक्चिना वन, अले बल्लाक हा काय् मफुगुलि गना वन।

7 अले हानं गुलि पुसा कंमा दुथाय् लात। कंमा तःमा जुया वःबलय् अन लाःगु पुसा थाहां वये मफुत, अन्न मसल।

8 अले गुलि पुसा भिंगु चा दुथाय् लात। थ्व चाय् पुसा बुया वयाः तःमा जुल। अले यक्व अन्न सल। गनं स्विदुगं, गनं खुइदुगं, गनं सछिदुगं अन्न सल।”

* 4:1 ४:१ लूक ५:१-३

9 वय्कलं धयादिल – “सुयाके न्हाय्पं दु, वं न्यना का।”

श्व उखानयागु अर्थ कंगु

मन्ती १३:१०-१७; लूक ८:९-१५

10 येशू याकःचा जूबलय् झिनिम्ह चेलात व मेपि मन्तय्सं वय्कःयाके श्व उखानयागु अर्थ छु खः धकाः न्यन।

11 वय्कलं इमित धयादिल – “परमेश्वरया राज्ययागु गुप्ति खँ छिमित कने धुनागु दु, मेपिन्त धाःसा उखान छुनाः धायेमाः।

12 “ ‘अय्जूगुलि इमिसं स्वयेत ला स्वइ,

अयनं गुब्सं खंके फइ मखु।

इमिसं न्यनेत न्यनी,

अयनं गुब्सं थुइके फइ मखु।

इमिसं थूगु जूसा ला

इपि पापं लिचिले माःगु खः,

अले इमिगु पाप नं क्षमा जुइमाःगु खः।’ ”☆

13 वय्कलं इमित धयादिल – “छु छिमिसं नं श्व उखान मथू ला? अय्जूसा मेगु उखान गथे थुइके फइ?

14 पुसा हल धाःगु परमेश्वरयागु वचन हल धाःगु खः।

15 गुलि मन्त लँय् लाःगु पुसा थें खः। इमिसं परमेश्वरयागु वचन न्यनेवं शैतान वयाः लाकायंकी।

16 गुलि मन्त ल्वहं दुथाय् लाःगु पुसा थें खः। इमिसं परमेश्वरयागु वचन लय्लयतातां न्यना काइ।

17 अथेसां वचनं इमिगु नुगलय् थ्यंक हा काय् मफइगुलि दुःखकष्ट व ख्याच्चः वयेवं इपि लिचिला वनी।

18 गुलि मन्त कंमा दुथाय् लाःगु पुसा थें खः। इमिसं वचन न्यनी।

19 अथेसां श्व संसारयागु धन्दा, धन सम्पत्तियागु माया व अथे हे मेमेगु लोभं यानाः परमेश्वरयागु वचन त्वःफिना वनी, अले छंु नं सय्के फइ मखु।

20 गुलि मन्त भिंगु चाय् लाःगु पुसा थें खः। इमिसं वचन नं न्यनी, अले मानय् नं याइ। इमिसं स्विदुगं, खुइदुगं, व सछिदुगं अप्वः अन्न सय्की।”

त्वाःदेवाय् च्वंगु मत
लूक ८:१६-१८

21 येशू इमित धयादिल – “सुनानं मत त्वपुया तइ ला? अथवा खाता तःले तइ ला? मत ला तज्जाः यानाः त्वाःदेवाय् च्याकी।”☆

22 छुं नं खँ सुचुकां तये फइ मखु, गुगु प्रकत जुइ मखु, छुं नं खँ गुप्त तये फइ मखु, गुगु जलय् वइ मखु।☆

23 सुयाके न्हायपं दु, वं न्यना का।”

24 वय्कलं इमित थथे नं धयादिल – “छिमिसं न्यनागु खँय् मन ति। गुलि छिमिसं कर्पिन्त बिल, उलि हे छिमित नं बी। अज्ज ला अप्वः हे बी,☆

25 छायाःसा दुम्हयसित अज्ज तनाबी। मद्महयसिके दुगु नं लाका काइ।”☆

तःमा जुयावःगु पुसायागु उखान

26 वय्कलं हानं धयादिल – “परमेश्वरयागु राज्य थथे च्वं। छम्ह मनुखं थःगु बुँइ पुसा हल।

27 व चान्हि घंसां दंसां पुसाय् चुलि ह्याः थाहां वयाच्चने धुंकी। थ्व गुकथं जुल वं सी मखु।

28 बुँ थःम्हं हे अन्न सय्की। न्हापां चुलि हइ, अले मा थाहां वइ, अले तिनि अन्न सइ।

29 थुकथं अन्न सये धुंकाः ईचां लइ, छायाःसा लयेगु ई जुइ धुंकी।”☆

दक्वसिबय् चिग्वःगु पुसायागु उखान

मत्ती १३:३१-३२; लूक १३:१८-१९

30 वय्कलं हानं धयादिल – “परमेश्वरयागु राज्य गथे च्वं धायेगु? थ्वयात ध्वाथुइकेत छु उखान छुइमाली?

31 परमेश्वरयागु राज्य ला दक्वसिबय् चिग्वःगु पुसा थें खः।

32 छम्ह मनुखं तू पुसा बुँइ हली। दक्वसिबय् चिग्वःगु पुसा जूसां थाहां वइबलय् थ्व दक्वसिबय् तःमा जुइ। थुकी कचामचा नं यक्व दइ, अले झंगःतय्सं वयाः थुकी थःगु स्वँ दय्की।”

33 थुकथं वय्कलं इमिसं थुइके फक्व उखान छुनाः वचन न्यंकादिल।

☆ 4:21 ४:२१ मत्ती ५:१५; लूक ११:३३ ☆ 4:22 ४:२२ मत्ती १०:२६; लूक १२:२ ☆ 4:24 ४:२४ मत्ती ७:२२; लूक ६:३८ ☆ 4:25 ४:२५ मत्ती १३:१२; २५:२९; लूक ११:२६ ☆ 4:29 ४:२९ योए ३:१३

34 वय्कलं इमित उखान मछुसे छुं नं स्यनामदी। थः चेलात जक दुबलय् धाःसा वय्कलं उखानयागु अर्थ नं कनादिल।

ग्वःफययात दिकादीगु

मत्ती ८:२३-२७; लूक ८:२२-२५

35 सन्ध्याकाः ई जुइ धुंकाः येशू इमित धयादिल – “वा, झी समुद्र पारिइ वनेनु।”

36 मनुतयगु हुलयात त्वःताः चेलात येशू च्वनाच्चंगु नांचाय् वनाः च्वन। अले इमिसं वय्कःयात ब्वनायंकल। इपिं नाप मेमेगु नांचा नं दु।

37 आकाझाकां समुद्रय् तसकं ग्वःफय् वल। लः ग्वारां यानाः नांचा धेधेचुल। नांचाय् लः नं जायावल।

38 वय्कः धाःसा नांचाया ल्युनेपाखे झायाः फुंग छगलय् छयं दिकाः घनाच्चन। चेलातय्सं वय्कःयात थनाः थथे धाल – “गुरु, झीपिं लखय् दुनाः सीन, छितः वास्ता मदु ला?”

39 अले वय्कलं दनाः फय्यात ब्वःबियाः समुद्रयात धयादिल – “शान्त जु।” धायवं हे ग्वःफय् दित, अले फुक्कभनं शान्त जुल।

40 वय्कलं धयादिल – “छिपिं छाय् थथे ग्यानागु? छिमिसं अज्ज नं विश्वास मयानानि ला?”

41 इपिं तसकं ग्यानाः थःथवय् थथे खँ ल्हात – “वय्कः सु खः? फय् व लखं नं वय्कलं धाःगु खँ न्यं।”

5

भूत दुब्युम्ह मनुयात लायकादीगु

मत्ती ८:२८-३४; लूक ८:२६-३९

1 वय्कःपिं समुद्र पारिइ गेरासेनसया जिल्लाय् थयंकः झाल।

2 वय्कः नांचां क्वहां झायवं भूत दुब्युम्ह छम्ह मनु दिपं पिने वयाः वय्कःयात नापलात।

3 व दिपय्सं च्वनीम्ह खः। वयात सुनानं सिखलं तक नं ची मफु,

4 छायाःसा वयात तःकः न्यवः व सिखलं ची धुंकूगु खः। अयनं वं सिखः नं चफुनाः न्यवः नं फयनाः बिस्सुं वनीगु। वयात सुनानं कजय् याये मफु।

5 व चान्हे पहाड व दिपय् चाःहिलाः थःम्हं थःत कयपुयाः ल्वहँतं घाःपा यानाः चिल्लाय् दनाः हाला जुइ।

6 येशूयात तापाकनिसें हे खनेवं ब्वाँय् ब्वाँय् वनाः वं वय्कःया तुतिइ भवपुलाः

7 ततःसलं थथे धाल – “हे दक्वसिब्य् तःधंह परमेश्वरया काय्, छि जिमिथाय् छाय् झायागु? जितः दुःख बी मते।”

8 “अय् भूतआत्मा, थ्व मन्या म्हं पिहां वाः” धकाः वय्कलं धयादीगुलि व थथे हाला हःगु खः।

9 अले वय्कलं वयाके “छंगु नां छु?” धकाः न्यनादिल।

वं वय्कःयात लिसः बियाः धाल – “जिगु नां फौज खः, छायाःसा जिपि यक्व दु।”

10 भूतआत्मां वय्कःयाके थथे धकाः बिन्ति यात – “जिमित थ्व देशं पितिना छ्वयादी मते।”

11 अन हे पाखाय् छगू बथां फा ज्वया तःगु दु।

12 इमिसं वय्कःयात थथे धकाः बिन्ति यात – “जिमित फाया थाय् छ्वयादिसँ, अले जिपि वनाः इमिके दुबी।”

13 वय्कलं इमित ज्यु धकाः धाय्वं इपि मनूयागु म्हं पिहां वनाः अन ज्वयातःपि फातय्के दुबित। अले निद्रःति फा ब्वाँय् वनाः भीरं क्वब्वात। अले समुद्रय् कुतुं वनाः सित।

14 फा जवाःत अनं बिस्युं वनाः शहर व गामय् न्यंकभनं थ्व खँ बयब्य् यानाबिल। थ्व न्यनाः छु जगु खः धकाः स्वयेत गांयापिं मनूत अन वल।

15 अले इपिं येशूयाथाय् थ्यंबलय् ला भूत दुब्यूमह मनूयात लायाः नं लं फिनाः वय्कः नाप फ्यतुनाच्चंगु खनाः इपिं ग्यात।

16 थ्व खंपिन्सं स्ववःपिन्त भूत दुब्यूमह मनू व फायात छु छु जुल धयागु फुक्कं कनाबिल।

17 अयज्गुलि इमिसं येशूयात इमिगु जिल्लां पिहां हँ धकाः बिन्ति यात।

18 वय्कः नांचाय् च्वने त्यंबलय् भूत दुब्यूमह मनुखं वय्कः नाप वये धकाः बिन्ति यात।

19 वय्कलं वये मते धकाः धयादिल। “परमेश्वरं छन्त गुलि तःधंगु ज्या यानादिल, अले हानं गथे छन्त माया क्यनादिल धकाः छँय् वनाः थः मनूतयत् कनाब्यु।”

20 व मनू अनं वनाः येशू वयात गुलि तःधंगु ज्या यानादिल धकाः डेकापोलिस धाःगु झिगू शहरय् बयब्य् यात। थ्व न्यनाः फुक्क मनूत अजू चाल।

सीमह मचा व मफुमह मिसा

मन्ती १:१८-२६; लूक ८:४०-५६

21 येशू हानं नांचाय् च्वनाः समुद्र पारिइ झाल। वय्कः समुद्र सिथय् च्वनाच्चंबलय् ग्वाः ग्वाः मनूत वय्कःयाथाय् मुंवल।

22 अबलय् धर्मशास्त्र स्यनीगु छँयाम्ह थकालि याइरस नांयाम्ह छम्ह मनुखं वय्कःयाथाय् वयाः भागियानाः

23 थथे बिन्ति यात – “जिमि चीधिकःम्ह म्हाय् सी थें च्वनाच्चन। छकः झायाः छिं वयात थिया घूसा व लनी, अले म्वाइ।”

24 वय्कः व नाप झायादिल। यक्व हे मनूत घ्वातुघ्वानाः वय्कःया ल्यूल्यू वन।

25 थ्व हुलय् झिनिदिनिसें हि क्वहां वइगु ल्वचं थिया च्वंम्ह छम्ह मिसा नं दु।

26 वं यक्व हे डाक्टरतयत वासः याके धुंकल। अयनं वयागु ल्वय् मलाः। दुगु फुक्कं वं वासः यायेत फुके धुंकल, अयनं लनेगु सट्टा वयागु ल्वय् झन झन स्यना वनाच्चन।

27 येशूयागु खँ न्यनातःगुलि वं हुलया दथुं दथुं वयाः ल्यूनं येशूयागु वसः थिल।

28 वं थथे मतिइ तःगु खः – “जिं वय्कःयागु वसः जक थी फुसां जिगु ल्वय् लायावनी।”

29 थीवं हे हि क्वहां वयाच्चंगु दित, अले वं थः लंगु सीकाकाल।

30 उघ्निमय् वय्कलं थःगु शक्ति पिहां वंगु सीकाः हुलय् लिफः स्वयाः – “सुनां जिगु वसः थिल?” धकाः धयादिल।

31 चेलातयसं वय्कःयात लिसः बिल – “छिं थुलिमछि हुलं घ्वातु घ्वानाच्चंगु ला खँ हे खं। छाया् ‘जितः सुनां थिल’ धकाः न्यनादिया?”

32 अयनं वय्कलं थःत सुनां थ्यूगु खः धकाः सीकेत छचाःखेलं स्वयादिल।

33 हि क्वहां वइगु ल्वय् दुम्ह मिसां थःगु ल्वय् लाःगु सियाः ग्याग्यां, थरथर खाखां वय्कःया न्ह्यःने भ्वसुलाः थःत जूगु फुक्क खँ कनाबिल।

34 अले वय्कलं धयादिल – “केहें मय्जु, छं विश्वास याःगुलि छंगु ल्वय् लन। आः मनय् शान्ति कयाः हूँ, छंगु ल्वचं छन्त थी हे मथीमा।”

35 वय्कः थथे खँ ल्हाना च्वंबलय् थकालिया छँया मनूत वयाः वयात थथे धाल – “छिकपिनि म्हाय् सी धुंकल। गुस्यात छाया् दुःख बिा च्वनादिया?”

36 इमिसं धाःगु खँ मताः थें यानाः वय्कलं वयात धयादिल – “ग्याये मते, विश्वास जक या।”

37 वय्कलं पनुस, याकूब व याकूबया किजा यूहन्ना बाहेक मेपिं सुयातं व्वनायंकामदी।

38 वय्कःपि व थकालियागु छँय् थ्यंबलय् अन यक्व मनूत हँय् हँय् ख्वयाच्चंगु खन।

39 वय्कलं दुहां झायाः इमित धयादिल – “छाय् ख्वयाच्वनागु? मचा मसीनि, घना जक च्वंगु खः।”

40 थ्व खँ न्यनाः इमिसं वय्कःयात गिजय् यात। वय्कलं इपि फुक्कसित पितिनाछवयाः मचाया मांबौ व वय्कःया स्वम्ह चेलातय्त सीम्ह मचा तया तःथाय् ब्वना यंकादिल।

41 वय्कलं सीम्ह मचायागु ल्हाः ज्वनाः धयादिल – “तालिथा कूमि!” थुकिया अर्थ खः – “नानी, दना वा!”

42 धाय्वं हे व जुस्क्क दनाः थुखे उखे जुल। व झिनिदँ तिनि दुम्ह खः। थ्व खनेवं इपि तसकं अजू चाल।

43 वय्कलं इमित थ्व खँ सुयातं कने मते धकाः उजं बियादिल। मचायात छुं नयेगु नकि धकाः नं धयादिल।

6

नासरतय् येशूयात मयय्कूगु

मन्ती १३:५३-५८; लूक ४:१६-२०

1 अनं येशू थःगु हे गामय् झाल। चेलात नं वय्कः नाप दु।

2 छन्हु विश्रामबार खन्हु धर्मशास्त्र स्यनीगु छैय् झायाः स्यनेकने यानादिल। वय्कःयागु खँ न्यनाः मनूतय्सं अजू चायाः थथे धाल – “थ्वयाके थज्याःगु बुद्धि व अजू चायापुगु ज्यायागु शक्ति गनं वल?

3 थ्व सिकःमि, मखु ला? थ्वया मां मरियम, थ्वया किजापि याकूब, योसेफ, यहूदा व सिमोन, मखु ला? थ्वया केहेंपि नं थन हे दु, मखु ला?” अथे जुया इमिसं वय्कःयात पत्याः मयात।

4 अले वय्कलं धयादिल – “अगमवक्तायात थःगु हे गामय् व थःगु हे छैय् मानय् याइ मखु, बरु मेथाय् न्ह्याथासं मानय् याइ।”☆

5 अन सुं उसौय् मदुपिन्त जक थःगु ल्हातं थियाः लाय्काबीगु सिबय् मेमेगु ततःधंगु ज्या वय्कलं यानामदी।

6 इमिसं वय्कःयात विश्वास याये मफुगुलि थुपि खनाः वय्कः छक्क जुल। थथे जूगुलि वय्कलं गामय् गामय् झायाः स्यनेकने यानादिल।

झिनिम्हय्सित भिंगु खँ न्यंके छवयादीगु

मन्ती १०:५-१५; लूक ९:१-६

☆ 6:4 ६:४ यह ४:४४

7 वयकलं झिनिम्ह चेलातयत् छथाय् मुंकाः भूतआत्मातयत् पितिनाछवयेगु अधिकार बियाः निम्ह निम्ह यानाः छवयादिल।

8 वयकलं इमित थथे उजं बियादिल, “कथि छपुं अप्वः छुं नं ज्वनावने मते, लँय वनेत मरि, म्हिचा, अले जनिखय् धिबा नं प्वःचिनाः यंके मते।

9 बरू लाकां न्ह्यानाः हूँ। वसः नं छजु जक फिनाः हूँ।”

10 वयकलं इमित थथे नं धयादिल – “छिपि गुगु छँय् च्वनागु खः, व गां त्वता मवंतले व हे छँय् च्वँ।

11 सुनानं छिमित दुमकाःसा, भिंगु खँ मन्यंसा छिमिसं इमित लज्या चाय्केत साक्षीया लागि लाकां थाथा यानाः व थाय् त्वःता हूँ।”☆☆

12 थुकथं इमिसं पिहां वनाः मनूतय्सं पश्चाताप यायेमाः धकाः न्यंकाजुल।

13 इमिसं यक्व भूतआत्मातयत् पितिनाछवल, यक्व उसाँय् मद्दुपिन्त चिकनं बुइकाः लाय्काबिल।☆

बप्तिस्मा बीम्ह यूहन्नायात स्याःगु

मती १४:१-१२; लूक ९:७-९

14 येशूयागु खँ प्यखें बयबय् जुयावंगुलि हेरोद जुजुयागु न्हाय्पनय् नं थ्व खँ थ्यन। गुम्ह गुम्हयूसिनं ला थथे नं धयाजुल – “बप्तिस्मा बीम्ह यूहन्ना हे सिनाः म्वानावःगु खः। उकिं हे ला थवं थज्याःगु ततःधंगु ज्या याये फत।”

15 गुलिसिनं थथे धाल – “थ्व ला एलिया खः।” हानं गुलिसिनं थथे नं धाल – “थ्व ला न्हापायाम्ह हे छम्ह अगमवत्ता खः।”☆

16 थ्व न्यनाः हेरोदं धाल – “थ्व जिं छ्यं ध्यंकाः स्यानाम्ह यूहन्ना हे म्वानावःगु खः।”

17 न्हापा हेरोदं थःकिजा फिलिपया कलाः हेरोदियासं यानाः बप्तिस्मा बीम्ह यूहन्नायात ज्वंकाः झ्यालखानाय् कुंगु खः। हेरोदं थःकिजा फिलिपया कलाः हेरोदियासयात कलाः तःगुलिं

18 यूहन्नां वयात थथे धकाः धाःगु खः – “थः किजाया कलाःयात थथे हये मत्यः।”☆

19 अयजूगुलि हेरोदियासयात यूहन्ना खनाः तं पिहां वःगु खः। वं यूहन्नायात स्यायेत नं स्वल। अयनं स्याये धाःसा मफु।

☆ 6:11 ६:११ प्रे १३:५१ ☆ 6:11 ६:८-११ लूक १०:४-११ ☆ 6:13 ६:१३ याक ५:१४ ☆ 6:15

६:१४-१५ मती १६:१४; मर्क ८:२८; लूक ९:१९ ☆ 6:18 ६:१७-१८ लूक ३:१९-२०

20 छाद्यधाःसा यूहन्ना धर्मीम्ह व पवित्रम्ह मनु खः धकाः स्यूगुलि ग्यानाः वं यूहन्नायात मस्यासे तयातःगु खः। यूहन्नाया खँ न्यनेबलय् वया नुगः त्वाकः बाकः जूसां वयागु खँ न्यने यः।

21 छन्हु हेरोदं यूहन्नायात स्यायेगु मौका काल। वयागु जन्मदिं खुन्हु छगू तःधंगु भवय् सःतल। भवजय् गालीलया हाकिमत, तःधंपि कप्तानत व मेमेपि ततःधंपि मनुतयत् सःतल।

22 भवजय् हेरोदियासया म्हाय् वयाः प्याखं हुल। वयागु प्याखं स्वयाः हेरोद व भवय् वःपि सकलें लयताल। अले जुजुं वयात धाल – “छन्त छु यः फ्वं? छं धाःगु बी।”

23 जुजुं पाफयाः धाल – “छं न्हागु हे फ्वंसां जिं बी, जिगु राज्य बच्छि हे जूसां बी।”

24 अले वं पिने वनाः मांम्हयसिके “जिं छु फ्वने” धकाः न्यन।

वया मांनं धाल – “बप्तिस्मा बीम्ह यूहन्नायागु छ्यं फ्वँ।”

25 उघ्रिमय् हे दुने जुजुयाथाय् वनाः वं “बप्तिस्मा बीम्ह यूहन्नायागु छ्यं भुइ तयाः बियादिसँ” धकाः फ्वन।

26 थ्व न्यनाः जुजुं तसकं हे नुगः मछिंकल, अयत्नं अन च्वंपि मनुतयगु न्हाःने वं बी धकाः पाफय् धुक्गुलि मबिसे मगात।

27 उघ्रिमय् हे जुजुं छम्ह सिपाइयात यूहन्नायागु छ्यं ध्यनाः हजि धकाः उजं बिल। इयालखानाय् हे वनाः वं यूहन्नायागु छ्यं धेनाः

28 भुइ तयाः व मचायात बी हल। अले वं व थः मांयात बी यंकल।

29 थ्व खँ न्यनाः यूहन्नाया चेलातयसं वयाः वयागु सीम्ह यंकाः थुनाबिल।

न्यादः मनुतयत् नकादीगु

मन्ती १४:१३-२१; लूक ९:१०-१७; यूह ६:१-१५

30 उखे प्रेरितत लिहां वयाः इमिसं यानावःगु ज्या व इमिसं स्यना वःगु खँ फुककं वय्कःयात कन।

31 यक्व मनुत वये वनेगु यानाच्वंगुलि वय्कःपिन्त नयेत तकं लिमलात। अथे जूगुलि वय्कलं धयादिल – “छिपिं सुं मदुगु थासय् वा, अले अन हे भचा झासु लंकि।”

32 अले इपिं अनं नांचाय् च्वनाः सुं मदुगु थासय् वन।

33 थथे वनाच्वंगु खंकाः मनुतयसं वय्कःपिन्त म्हासीकल। अले इपिं गां गामं ब्वाँय् ब्वाँय् वनाः वय्कःपिं स्वयाः न्हापा हे थयंकाच्वन।

34 वय्कः नांचां कुहां झाःबलय् यक्व मनूत मुनाच्चंगु खनाः वय्कःयात तसकं माया वन, छायाःसा इपिं जवाः मद्रुपिं फैचात थें च्वं। अले वय्कलं इमित तःता खँय् स्यनेकने यानादिल।☆

35 न्हि यक्व बी धुंकूगुलि चेलात वयाः थथे धाल – “थन ला छुं हे मद्रु, हानं तसकं लिबाय् धुकल।

36 इमित छवयादिसँ, अले इमिसं लिक्क लिक्क लाःगु गामय् वनाः नयेगु न्यानाः नइ।”

37 वय्कलं धयादिल – “छिमिसं हे इमित छुं नकि।”

अले इमिसं धाल – “निसः दिनारया जक मरि न्यानाः इमित नकेगु ला।”

38 वय्कलं इमिके न्यनादिल – “छिमिके खःपाः मरि दु? स्वसा।”

इमिसं स्वयाः “न्यापा मरि व निम्ह न्या दु” धकाः धाल।

39 अले वय्कलं मनूतयत् ख्यलय् इवःलाक फ्यतुकि धकाः धयादिल।

40 अले इपिं नेयम्ह नेयम्ह व सछिम्ह सछिम्हया ल्याखं इवः छुनाः फ्यतुत।

41 अनंलि वय्कलं न्यापा मरि व निम्ह न्या कयाः स्वर्गपाखे स्वयाः परमेश्वरयात सुभाय् बियादी धुंकाः मरि कुचा थलाः चेलातयत् इंके बिल। अथे हे निम्ह न्या नं इनाबियादिल।

42 इमिसं यतले नल।

43 अले इना ल्यं दुगु मरि व न्या हे झिंनिगः दाला जायेक दु।

44 मस्त व मिसात ल्याः मतसे अन मरि नःपिं मिजंत जक हे न्याद्रः दु।

येशू लखय् घःने न्यासि झाःगु

मन्ती १४:२२-३३; यहू ६:१६-२१

45 अले उघ्रिमय् हे येशू चेलातयत् नांचाय् तयाः पारिइ बेथेसदाय् छवयादिल। अनं लिपा वय्कलं मनूतयत् बिदा बियाः छवयादिल।

46 थथे मन्तयत् छँय् छवयादी धुंकाः वय्कः पहाडय् प्रार्थना यायेत थाहां झाल।

47 बहनी जूबलय् नांचा समुद्र दथुइ थ्यनाच्चन। थुबलय् वय्कः समुद्र सिथय् याकःचा च्वनाच्चन।

48 फय् अःखतं वयाच्चंगुलि चेलातयस् नांचा न्हाके मफया च्वन। थव खनाः सुथ न्हापां खिउँ खिउँ धाःबलय् हे वय्कः समुद्रय् न्यासि वनाः इमिथाय् थ्यंकः झाल। वय्कः इमिगु न्हाःने झायेत्यन।

☆ 6:34 ६:३४ गन्ती २७:१७; १ राज २२:१७; २ इति १८:१६; इज ३४:५; मन्ती १:३६

49 वय्कःयात थथे समुद्रय् न्यासि झायाच्च्वंगु खनाः इपिं “भूत भूत” धकाः चिल्लाय् दनाः हाल,

50 छायाधाःसा थ्व खनाः इपिं सकलें ग्यात।

अले वय्कलं इमित धयादिल – “साहस या, जि हे खः, ग्याये म्वाः।”

51 वय्कः इपिंनापं तुं नांचाय् च्वनादिल। उघ्रिमय् हे फय् दित। थ्व खनाः इपिं फुक्कं छक्क जुल।

52 इमिसं आः तक नं मरियागु खँ थुइके मफुनि, छायाधाःसा इमिगु नुगः अज्जं छाःनि।

उसाँय् मदुपिन्त लाय्कादीगु

मन्ती १४:३४-३६

53 पारिइ थयंकाः इमिसं गनेसरेत धाःगु थासय् नांचा दिकल।

54 वय्कःपिं क्वहां झाय्वं फुक्क मन्तयसं वय्कःयात म्हसीकल।

55 उकिं इमिसं उखेंथुखें ब्वाँय् जुयाः वय्कः गन गन झाल अन अन हे उसाँय् मदुपिन्त ब्वना हल।

56 थुकथं वय्कः गन गन झाल, अन अन हे – गामय्, शहरय् व बजारय् उसाँय् मदुपिन्त लँय् लँय् हे हयातइगु। अले इमिसं वय्कःयागु लंया च्वः जक थीत बिन्ति याइगु। थुकथं लं थ्यूपिं फुक्कं लाया वन।

7

थितिकुतियागु खँ

मन्ती १५:१-९

1 येशूयाथाय् यरूशलेमं वःपिं शास्त्रीत व फरिसीत वयाच्च्वंगु दु।

2 थुमिसं चेलातयसं ल्हाः मस्युसे हे नःगु खन।

3 फरिसीत व फुक्क यहदीतयसं पुलांगु थितिकुति मानय् याइगुलि इमिसं ल्हाः मस्युसे गुबलें मनः।

4 इमिसं बजारय् वनाः लिहां वयाः म्हय् लः हा हा यानाः थःत च्वख मयातले नइ मखु। थुलि जक मखु, इमिसं मानय् यानाच्च्वंगु यक्व हे दु – ख्वलाखिला, जासिकेंसि, अले कँय्यागु थलबलय् नं लः हा हा यायेमाः।

5 फरिसीत व शास्त्रीतयसं वय्कःयाके न्यन – “छिमि चेलातयसं छाया तापाःबाज्यापिनिगु थितिकुति मानय् याना मच्च्वंगु, अले हानं ल्हाः मस्युसे नल?”

6 वयक्लं धयादिल — “छिपिं निपाः ख्वाःपाः दुपिं खः धकाः यशैया अगमवत्तां च्वयातःगु धात्थे हे खः खनी —

“ थुमिसं म्हतुं ला
जितः तसकं हनाबना तइ।
नुगलं धाःसा
थुपिं तसकं तापाना च्वनी।✱

7 थुमिसं थःपिन्सं दयक्कुगु थितिकुतियात
परमेश्वरयागु आज्ञा खः धकाः
मनूतयत् स्यना जुइ।
उकिं थुमिसं जिगु सेवा याःसां
छप्ति ज्यालगय् मजू।’

8 “छिमिसं परमेश्वरयागु आज्ञायात मानय् मयासें मनूतयगु थितिकुतियात मानय् यानाच्वन।”

9 वयक्लं हानं धयादिल — “छिमिसं गुलि अःपुक परमेश्वरयागु आज्ञायात छखे चीकाः मनूतयगु थितिकुति मानय् याये सः।

10 मोशां थथे च्वयातःगु दु — ‘थः मां बौयात हनाबना ति। मां बौयात म्हतु वाइपिन्त स्यानाछ्व।’✱

11 छिमिसं धाःसा थथे धकाः स्यना जुल — ‘सुनानं थः मां बौयात बीमाःगु खँ परमेश्वरयात छाये धुन धकाः धाइ (थुकियात कुर्बान धाइ)

12 वं थः मां बौयात हनाबना तये म्वाः, अले बीमाःगु ग्वाहालि नं बीकी मखु।’

13 थुकथं छिमिगु थितिकुति परमेश्वरयागु आज्ञायात ज्यालगय् मजूइका छवइ। थज्याःगु ला छिमिसं यक्व हे यानाच्वंगु दु।”

मनूतयत् अशुद्ध याइगु खँ

मन्ती १५:१०-२०

14 हानं येशू मनूतयगु हलयात थःथाय् सःताः धयादिल — “छिपिं फुक्कसिनं जिगु खँ न्यँ, अले थुइकि।

15 नयेत्वनेगु छुकिं नं मनूया म्हय् दुने वनाः वयात अशुद्ध याइ मखु, बरु मनूयागु नुगलं पिहां वइगुलि हे मनूयात अशुद्ध याइ।

16 सुयाके न्हायपं दु वं न्यना का।”

17 मनूतयत् त्वःताः वयकः छैय् दुने झायादीबलय् वयकःया चेलातयसं थ्व उखानयागु अर्थ छु खः धकाः न्यन।

18 अले वयकलं धयादिल – “छिमिसं नं थुइके मफु ला? छिमिसं गथे थुइके मफुगु? म्हतुं मनूया म्हय् दुहां वंगु खं वयात अशुद्ध याये फइ मखु।

19 छायाधाःसा थ्व फुक्क नुगलय् दुने मखु, बरु प्वाथय् वनीगु खः, अले हानं पिहां तुं वइ।” (थथे वयकलं नयेगु फुक्क च्वख जू धकाः धयादीगु खः)

20 अले हानं वयकलं धयादिल – “मनूयागु दुने पिहांवइगु खं जक वयात अशुद्ध याइ,

21 छायाधाःसा मनूयागु दुनुगलंनिसें थथे मभिंगु बिचाः पिहां वइ – व्यभिचार यायेगु, खुइगु, स्यायेगु,

22 लोभी जुइगु, मभिंगु ज्या यायेगु, थगय् यायेगु, लाः लाः थें सनाः जुइगु, नुगः मुइकेगु, मेपिन्त मभिंकाः खँ ल्हायेगु, घमण्डी जुइगु, मूर्ख ज्या यायेगु।

23 थ्व फुक्क मभिंगु ज्या मनूयागु दुनेनिसें पिहां वइ, अले वयात अशुद्ध याइ।”

छम्ह यह्दीमखुम्ह मिसायागु विश्वास

मन्ती १५:२१-२८

24 वयकः अनं टुरोस व सीदोन जिल्लाय् झाल। सुनानं मसीमा धकाः वयकः छखा छैय् दुहां झाल। अयनं मनूतयसं सीकाकाल।

25 भूतआत्मा दुबिना च्वंम्ह छम्ह मिसामचाया मांनं येशू छैय् दी धयागु सीकाः काचाकाचां वयाः वयकःया तुतिइ भवपुल।

26 व सिरियाया फोनिकेय् च्वंम्ह छम्ह ग्रीक खः। वं वया म्हाय्याके दुबिना च्वंम्ह भूतआत्मायात पिछवयादिसें धकाः वयकःयात बिन्ति यात।

27 वयकलं धयादिल – “न्हापां मस्तयत् निं गाक्क नके ब्यु, छायाधाःसा मस्तयसं नयाच्वंगु लाकाः खिचायात वान्छवया बी मज्यू।”

28 वं धाल – “खः प्रभु, खिचातयसं नं ला मस्तयसं वाक्कुगु नये खं निं।”

29 अले वयकलं धयादिल – “छं थथे धाःगुलि छिमि म्हाय्या म्हां भूतआत्मा पिहां वने धुंकल, आः छ वंसां जिल।”

30 छै थ्यंबलय् वं भूतआत्मा मचाया म्हां पिहां वने धुंकुगुलि मचा लासाय् घनाच्वंगु खन।

ख्वाँय् व खाखःम्हयसित लाय्कादीगु

- 31 येशू टुरोस जिल्लां सीदोन जुयाः डेकापोलिसपारखें गालील समुद्र थ्यंक झाल।
 32 अन मनूतयसं वयक्कःयाथाय् छम्ह ख्वाँय् व खाखःम्हय्सित हल, अले इमिसं वयात ल्हातं थियादिसँ धकाः बिन्ति यात।
 33 वयक्कलं वयात मनूतयथासं छखेलिक यंकाः वयागु न्हायपनय् ल्हाः तयादिल। अले ई फानाः वयागु मे थियाः
 34 स्वर्गय् थस्वयाः झसुकाः तयाः वयात धयादिल – “इप्फात!” थुकियागु अर्थ खः – “चालेमा!”
 35 अले वयागु न्हायपं चाल, मे सन, थथे वं त्याजिक नवाये फत।
 36 अले “इमित सुयातं धाये मते” धकाः उजं बियादिल। गुलि गुलि वयक्कलं इमित धाये मते धकाः धयादी, उलि उलि हे इमिसं बय्बय् याः जुइ।
 37 थ्व खनाः मनूतयसं अजू चायाः थथे धाल – “वयक्कलं यानादीगु ला फुक्कं भिं जू, ख्वाँय्यात ताय्कादिल, अले खाखःयात नवाये फय्कादिल।”

8

प्यट्टः मनूतयत् नकादीगु

मन्ती १५:३२-३९

- 1 उबलय् हानं ग्वाः ग्वाः मनूत मुनाच्चन। थुमिके नयेगु छुं हे मदुगुलि येशू थः चेलातयत् सःताः धयादिल –
 2 “थ्व मनूत खनाः जितः माया वं। थुपि जि नाप च्वनाच्चंगु स्वन्हू दय् धुंक्कल। नयेगु नं छुं हे मदु।
 3 जिं थुमित अथें खालि प्वाथं छँ हँ धाल धाःसा ला थुपि लँय् हे मुख्यां जुइ, छायाःसा गुलि मनूत ला तापाकंनिसँ वःपि दु।”
 4 चेलातयत् धाल – “थथे सुं मदुथाय् थुलिमछि मनूतयत् सुनां गथे यानाः नके फइ?”
 5 अले वयक्कलं न्यनादिल – “छिमिके ग्वःपाः मरि दु?”
 इमिसं धाल – “न्हय्पाः।”
 6 वयक्कलं इमित फ्यतुकादिल। अले मरि कयाः परमेश्वरयात सुभाय् बियाः कुचा थलाः चेलातयत् मनूतयत् इनाब्बु धकाः बियादिल। अले इमिसं यंकाः इनाबिल।
 7 इमिके चिचीधिकःपि न्या नं भचा दुगुलि वयक्कलं व नं कयाः परमेश्वरयात सुभाय् बियाः चेलातयत् इंके बियादिल।
 8 इमिसं यतले नल। अले इनाः ल्यं दुगु मरि हे न्हय्गः दाला जायेक दु।

9 अन प्यद्रः ति मनूत दु। अले वय्कलं इमित बिदा बियाः छवल।

10 वय्कः अनं थः चेलात नाप नांचाय् च्वनाः दलमनुथा जिल्लाय् झाल।

अजू चायापुगु चिं क्यनेगु इनाप

मती १६:१-१२

11 फरिसीत वयाः वय्कः नाप खँ लहाः वल। इमिसं वय्कःयात जाँचय् यायेत स्वर्ग छगू चिं हजि धकाः पवन।*

12 वय्कलं झसुकाः तयाः धयादिल – “छाय् थौकन्हय्यापिं मनूतय्सं चिं माला जुइगु? जिं छिमित धात्थें धाये – थज्याःपिं मनूतय्त छुं हे चिं क्यनी मखु।”*

13 इमित अन हे त्वःताः वय्कः नांचाय् च्वनाः पारिइ झाल।

14 उबलय् इमिसं मरि यंके ल्वःमन। इमिके नांचाय् छपा हे जक मरि दु।

15 वय्कलं इमित ख्याच्चवः बियाः धयादिल – “बांलाक होश या, हेरोद व फरिसीतय्गु सोडापाखें बचय् जुयाच्चें।”*

16 “झीके मरि मदुगुलि वय्कलं थथे धयादीगु खः?” धकाः चेलात थःथवय् खँ लहात।

17 थ्व खँ सीकाः वय्कलं इमित धयादिल – “छिपिं छाय् मरि मदु धकाः हालाच्चनागु? छिमिसं आः तक नं थुइके मफुनि ला? छिमिगु नुगः अज्ज नं छाःनि ला?”

18 मिखा दयाः नं छिमिसं मखं ला? न्हाय्पं दयाः नं छिमिसं मताः ला? थुलि याकनं हे ल्वःमने धुंकल ला?*

19 न्याद्रः मनूतय्त नकेत जिं न्यापा मरि छिमित इनाबीत बियाबलय् ग्वःगः दाला ल्यं दत?”

इमिसं धाल – “झिनिगः दाला।”

20 “प्यद्रः मनूतय्त नकेत जिं न्हय्पाः मरि छिमित इनाबीत बियाबलय् ग्वःगः दाला ल्यं दत?”

इमिसं धाल – “न्हय्गः दाला।”

21 अले वय्कलं धयादिल – “आः नं मथूनि ला?”

छम्ह कांयात लाय्कादीगु

22 अनं वय्कःपिं बेथसेदाय् थ्यंकः झाल। मनूतय्सं छम्ह कांम्ह मनूयात हयाः वयात थियादिसँ धकाः वय्कःयात बिन्ति यात।

* 8:11 ८:११ मती १२:३८; लूक ११:१६ * 8:12 ८:१२ मती १२:३९; लूक ११:२९ * 8:15 ८:१५
लूक १२:१ * 8:18 ८:१८ यर ५:२९; इज १२:२; मर्क ४:१२

23 वय्कलं काम्हयसित ल्हाः ज्वनाः गामं पिने यंकादिल। अले वयागु मिखाय् ई तयाः ल्हातं थियाः धयादिल – “छं छुं खं ला?”

24 काम्हं च्वय् थस्वयाः धाल – “जिं मनु ला खना अथेसां इपिं सिमा थें न्यासि वनाच्चंगु खना।”

25 वय्कलं हानं वयागु मिखाय् ल्हाः तयादिल। अले ला वं बांलाक हे स्वये फत, फुक्कं यचुकु खनेदत।

26 वय्कलं धयादिल – “सरासर छँ हूँ, गामय् दुहां वने मते।”

पत्रुसं वय्कःयात ख्रीष्ट खः धाःगु

मन्ती १६:१३-२०; लूक ९:१८-२१

27 अनं येशू चेलातनापं कैसरिया फिलिप्पी धाःगु जिल्लाय् झाल। लैय् वय्कलं चेलातयत् थथे धकाः न्यनादिल – “मनूतय्सं जितः सु धकाः धयाजुल?”

28 इमिसं धाल – “गुलिसिनं बप्तिस्मा बीम्ह य्हन्ना धाइगु,” गुलिसिनं “एलिया धाइगु, अले गुलिसिनं मेम्ह हे अगमवत्ता जुइ धकाः धाइगु।”☆

29 अले वय्कलं न्यनादिल – “छिमिसं जितः सु धकाः धयाच्चना लय्?”

पत्रुसं लिसः बिल – “छि मुक्ति बीम्ह ख्रीष्ट खः।”☆

30 अले वय्कलं थ्व खँ सुयातं कने मते धकाः आज्ञा बियादिल।

थः सीगु खँ कनादीगु

मन्ती १६:२१-२३; लूक ९:२२

31 अबलय् निसं येशू चेलातयत् ध्वाथुइक धयादिल – “मनूया कायनं यक्व हे दुःख सी मानि। थकालिपिं, तःधंपि पुजाहारीत व शास्त्रीतय्सं वयात मानय् याइ मखु, बरु इमिसं वयात स्याइ। स्वन्हु लिपा व हानं म्वाना वइ।”

32 वय्कलं थ्व ध्वाथुइक धयादिल। अले पत्रुसं वय्कःयात छखे यंकाः थथे धयादी मते धकाः ब्वःबिल।

33 वय्कलं फनक्क फहिलाः चेलातयत् स्वयाः पत्रुसयात थथे धकाः हक्कादिल – “शैतान, छ जिगु न्ह्याःने च्वने मते, छायाःसा छं ला परमेश्वरयागु खँय् मखु, बरु मनूतयगु खँय् जक ध्यान तयाच्चन।”

गथे यानाः येशूया चेला जुइगु

मन्ती १६:२४-२८; लूक ९:२३-२७

34 अले वयकलं थः चेलातयूत व अन च्वंपि मनूतयूतनापं सःताः थथे धयादिल – “जि नाप वयेगु जूसा छिपिं सुनानं थःगु खँय् छुं हे च्यूताः काये मते। अले थःगु कूस थःम्हं हे क्वबिया सीत तर्कं लिमच्युसे जिगु ल्यूल्यू वा।”☆

35 थःगु प्राण बचय् यायेत जक स्वइम्ह मनू नाश जुयावनी। सुनां जिगु निरिति व भिंगु खँयागु निरिति थःगु प्राण पाइ व बचय् जुइ।☆

36 सारा संसार हे ल्हातयू दयाः नं व मनू सिनावन धाःसा वयात छु दइ?

37 वं हानं थःगु प्राण छुकिं लिफ्याना काइ?

38 थ्व पापी व मभिंगु संसारयू सुनां जि व जिगु खँ न्यनाः ख्वाः फस्वय्की मनूया कायून् स्वर्गादूत नाप झःझः धाय्क परमेश्वर बाःनं छवया हइबलय् व खनाः लज्या चाइ।”

9

1 वयकलं हानं धयादिल – “थुलि जक मखु, जिं छिमित मेगु नं धाये – थन दनाच्वंपिं मध्ये गुम्हं गुम्हं मनूत परमेश्वरयागु राज्य झःझः धाय्क वःगु मखंतले सी मखु।”

येशूयागु रूप ह्यूगु

मती १७:१-१३; लूक ९:२८-३६

2 खुन्हु लिपा येशू पत्रुस, याकूब व यूहन्नायात ब्वनाः पहाडयू झाल। अन मेपिं सुं हे मटु। इमिसं स्वस्वं हे वयकःयागु रूप हिला वन।

3 वसः यचुसे त्वइसे च्वनाः थिनाच्वन, थथे ला थ्व संसारयू च्वंपिं सुनानं यचुके फइ मखु।

4 अन एलिया व मोशा खनेदयावल। इपिं येशू नाप खँ ल्हानाच्वन।

5 थ्व खनाः पत्रुसं वयकःयात धाल – “गुरूजु, इपीं थन हे च्वने दत धाःसा गुलि बांलाइ। जिमिसं स्वंगू बल्चा दयके ला। छगू छितः, छगू मोशयात व मेगु छगू एलियायात।”

6 इपिं तसकं हे ग्याःगुलि पत्रुसं छु धायेत्यंगु खः वं धाये मसल।

7 अले सुपाँय् वयाः इमित त्वपुल। सुपाँय् दुनें थथे धयाहःगु सः ताये दत – “थ्व जि यःम्ह कायू खः। थ्वं धाःगु खँ न्यँ।”☆☆

8 इमिसं छचाःखेलं स्वल, सुं हे मखन, अन ला इपिं व येशू जक दु।

☆ 8:34 ८:३४ मती १०:३८; लूक १४:२७

☆ 8:35 ८:३५ मती १०:३९; लूक १७:३३; यूह १२:२५

☆ 9:7 ९:७ मती ३:१७; मर्क १:११; लूक ३:२२

☆ 9:7 ९:२-७ २ पत्र १:१७-१८

9 पहाडं क्वहां झाया च्वंबलय् वयकलं इमित थथे उजं बियादिल – “मनूया काय् सिना: म्वाना मवतलय् थ्व खँ सुयातं धाये मते।”

10 थथे धयादीगुलि इमिसं सुयातं मसीकुसे मनय् जक तथा तल। अयसां इमिसं सिना: म्वायेगु धा:गु छु जुइ धका: थ:थवय् खँ ल्हानाच्चन।

11 अले वयक:याके न्यन – “शास्त्रीतयसं न्हापालाक एलिया हे वयेमा: धका: छाय् धयाच्चंगु?”*

12 वयकलं धयादिल – “ख:, एलिया नि न्हापालाक वया: फुक्कं मिलय् याइ। मनूया कायनं यक्व दु:खकष्ट सिया: हेला याका च्वनेमाली धका: छाय् धर्मशास्त्रय् च्वयात:गु?”

13 जिं छिमित धात्थें धाये – एलिया ला वये धुंकल। धर्मशास्त्रय् च्वया त: थें तुं इमिसं वयात य:थें याना: दु:खकष्ट बियाछवत।”

भूत दुब्यूम्ह मचायात लायकादीगु

मत्ती १७:१४-२१; लूक ९:३७-४३

14 वयक:पि मेपि चेलातयथाय् लिहां झा:बलय् अन यक्व मनूत मुनाच्चंगु व शास्त्रीत वयक:या चेलात लिसे हालाच्चंगु खन।

15 वयक:पि झा:गु खना: फुक्क मनूत छक्क जुया: ब्वाँय् वना: लसकुस यात।

16 अले वयकलं न्यनादिल – “छिपिं इपि नाप छु खँय् हालाच्चवनागु?”

17 छम्हयसिनं वयक:यात लिस: बिल – “गुरूजु, जिं जिमि काय्यात लाताम्ह भूत दुबिना च्वंगुलि छिथाय् हया।

18 भूत दुबित धायेवं व बैय् जू वनी, अले ई भ्वाललल भ्वाललल ल्हया: वाकुधी न्हया: तिल्ल प्यना वनी। छिकपिनि चेलातयत् भूत पिछवया ब्यु धका: धयां इमिसं पिछवये मफुत।”

19 अले वयकलं धयादिल – “छिमिसं गथे जक विश्वास याये मफुगु? जि छिपिनाप गुलि हे च्वनीतिनि धका:? जिं छिमिगु निंति गुलि जक दु:ख सह यानाच्चवनेगु? मचायात थन हजि।”

20 अले मचायात वयक:याथाय् हल। भूतआत्मां येशूयात खनेवं मचायात कसा: याना: बैय् छवावात। अले मचां ग्वारा ग्वारा तुला: म्हुतुइ ई भ्वाललल भ्वाललल वयकल।

21 थ्व खना: वयकलं न्यनादिल – “थथे जूगु गुलि दत?”

* 9:11 १:११ मला ४:५; मत्ती ११:१४

बौम्हयूसिनं धाल – “मचानिसैं।

22 थ्व भूतआत्मां वयात स्यायेत अप्वः हे मिइ व लखय् वान्छवया बी धुंकल। छिं छुं यानादी फुसा, दया यानाः ग्वाहालि यानादिसैंरे।”

23 अले वयकलं धयादिल – “जिं याये फु धकाः छं विश्वास याःसा मजी माःगु छु दु धकाः? विश्वास याःपिन्त ला फुक्कं जुइ।”

24 उघ्रिमय् वं धाल – “जिं विश्वास याना, अयनं विश्वासय् बमलाःनिगुलि जितः ग्वाहालि यानादिसैं।”

25 ग्वाः ग्वाः मनूत वयाच्चंगु खनाः वयकलं भूतआत्मायात हक्काः धयादिल – “हे लाताम्ह व ख्वाँयम्ह भूतआत्मा, जिं छन्त धयाच्चवना – वयाथासं पिहां वा, अले हानं गुबलें हे वयाके दुबी मते।”

26 भूतआत्मा चिल्लाय् दना हालाः मचायात इसाःथिसाः यानाः पिहां वल। अले व मचा सीम्ह थें च्वना वन। फुक्कसिनं ला मचा सित हे धकाः धाल।

27 तर वयकलं ल्हाः ज्वनाः थनादिल, अले व दना वल।

28 छैय् दुने झाये धुंकाः चेलातयसं सुतुक्क वयकःयाके थथे धकाः न्यन – “जिमिसं भूतयात छाय् पिछ्वये मफुगु?”

29 वयकलं धयादिल – “थज्याःम्ह भूतयात ला प्रार्थना मयाय्क पिछ्वये फइ मखु।”

येशू हानं थः सीगु खँ कनादीगु

मती १७:२२-२३; लूक ९:४३-४५

30 अनं वयकःपि गालील जुयाः झाल। वयकःपि गन वनाच्चंगु धकाः सुनां मसीमा धयागु वयकःया इच्छा खः।

31 छायाःसा लँय् वँ वयकलं चेलातयत् थथे धकाः स्यनादिल – “मनूया काय्यात ज्वनाः मनूतयगु हे ल्हातय् लः ल्हाइगु ई वइन। इमिसं वयात स्याइ, अले स्वन्हु दय्काः हानं म्वाना वइ।”

32 इमिसं धाःसा वयकलं धयादीगु खँ बांलाक मथु, अयसां न्यनेत गयात।

दकलय् तःधंम्ह सु?

मती १८:१-५; लूक ९:४६-४८

33 वयकःपि कफर्नहुमय् थयंकाः छैय् झाये धुंकाः वयकलं इमिके “लँय् छु खँ ल्हाना च्वनागु?” धकाः न्यनादिल।

34 इपि सुम्क च्वन, छायाधाःसा लँय् इपि मध्ये सु तःधं धकाः हाला वयाच्वंगु खः।☆

35 अले वयक्कलं फ्यतुनाः झिनिम्हयसितं सःताः थथे धयादिल – “दकलय् न्हापा जुइत स्वइम्हयसियां दकलय् लिपा च्वनेमाः, अले फुक्कसियां च्यः जुइमाः।”☆

36 थुलि धयाः वयक्कलं छम्ह मचायात हयाः इमि दथुइ तयादिल। अले वयात मुलय् तयाः इमित धयादिल –

37 “सुनां जिगु नामय् थज्याःम्ह मचायात लसकुस याइ, वं जितः हे लसकुस याःगुति ग्यनी। सुनां जितः लसकुस याइ वं जितः लसकुस याःगु मखु, जितः छवया हःम्हयसित लसकुस याःगु खः।”☆

सु झी शत्रु मखु व झीम्ह हे मन् खः
लूक ९:४९-५०

38 छन्हु यूहन्नां येशूयात धाल – “गुरूजु, जिमिसं छिगु नामं भूत ख्यानाः च्वंम्ह छम्ह मनूयात खना। जिमिसं वयात अथे याये मते धकाः धया, छायाधाःसा व झीपिलिसे जुयाच्वंम्ह मखु।”

39 वयक्कलं धयादिल – “वयात पने मते, छायाधाःसा जिगु नामं ततःधंगु ज्या यानाच्वंपि सुनानं जितः मभिके छालि मखु।

40 सु झी शत्रु मखु, व झीम्ह हे मन् खः।☆

41 जिं छिमित धात्थें धाये – सुनानं ख्रीष्टया मनूत धकाः छिमित लः जक त्वंकसां वयात इनाम दइ।”☆

पापय् लाकीगु खँ

मती १८:६-९; लूक १७:१-४

42 “सुनानं जितः विश्वास यानाच्वंम्ह छम्ह चिधंम्ह मनूयागु जक नं विश्वास स्येकेत स्वल धाःसा वयात गःपतय् ल्वहंघः घाकाः समुद्रय् वांछवयेगु हे बांलाइ।

43 छंगु ल्हातं छन्त पापय् लाकी धाःसा उकियात पाला छव। निपा ल्हाः दयकाः नरकयागु गुबलें मसीगु मिइ लायगु स्वयाः ला ल्हाः मदयक म्वानाच्वनेगु हे भिं।☆

44 अन छवयाच्वंगु मि गुबलें सी मखु, अले हानं की नं गुबलें हे सी मखु।

☆ 9:34 ९:३४ लूक २२:२४ ☆ 9:35 ९:३५ मती २०:२६-२७; २३:११; मर्क १०:४३-४४; लूक २२:२६

☆ 9:37 ९:३७ मती १०:४०; लूक १०:१६; यूह १३:२० ☆ 9:40 ९:४० मती १२:३०; लूक ११:२३

☆ 9:41 ९:४१ मती १०:४२ ☆ 9:43 ९:४३ मती ५:३०

- 45 छंगु तुति छन्त पापय् लाकी धाःसा उकियात पाला छव। तुति निपा दयकाः नरकयागु गुबलें मसीगु मिइ लायेगु स्वयाः ला तुति मदय्क म्वानाच्चनेगु हे भिं।
- 46 अन छवयाच्वंगु मि गुबलें सी मखु, अले हानं की नं गुबलें हे सी मखु।
- 47 अथे हे छंगु मिखां छन्त पापय् लाकी धाःसा उकियात लिकयाः वान्छवया ब्यु। मिखा निगलं मदयेका नरकयागु मिइ वांछवय्का च्वनेगु स्वयाः ला छंगु लागि कां जुयाः परमेश्वरयागु राज्यलय् दुहां वनेगु हे भिं।☆
- 48 अन छवयाच्वंगु मि गुबलें सी मखु, अले हानं की नं गुबलें सी मखु।☆
- 49 “छम्ह छम्हयसित मिं हे चि सवाः वयकी।
- 50 चि भिं जु, अथेसां चिं चियागु सवाः तंकूसा गय् यानाः चि सवाः वय्केगु? छिपिं चि सवाः वःपिं जुयाच्वेँ, अले फुकक नाप मिलय् जुयाच्वेँ।”☆

10

पारपाचुकेगु खँ

मत्ती १९:१-१२; लूक १६:१८

- 1 गालील त्वःताः येशू यहदिया जिल्लाय् झायाः अनं यर्दन खुसिया पारिइ झाल। अन नं वयकःयाथाय् ग्वाः ग्वाः मनूत मुंनःगुलि न्हाबलें थें वयकलं इमित स्यनेकने यानादिल।
- 2 अन नं फरिसीत वयाः वयकःयागु मन स्वयेत थथे धकाः न्यन – “मनूतय्सं थः कलाःयात त्वःते ज्यू ला कि मज्यू?”
- 3 वयकलं धयादिल – “मोशां छिमित छु या धकाः धया थकल?”
- 4 इमिसं धाल – “मोशां ला भवं च्वयाः पारपाचुकूसां ज्यू धकाः धाःगु दु।”☆
- 5 अले वयकलं लिसः बियादिल – “छिमिगु नुगः छाःगुलि हे मोशां अथे पारपाचुकूसां ज्यू धकाः धयाथकूगु खः।
- 6 दकलय् न्हापा सृष्टि यानादीबलय् हे परमेश्वरं इमित मिजं व मिसा यानाः दयकादीगु खः।☆
- 7 अयजूगुलि मनूत थः मां बौयात त्वःताः कलाःनापं च्वंवनी।
- 8 अले इपिं निम्हं छम्ह हे जुइ। उकिं आः इपिं निम्ह मखु, छम्ह हे जुइ धुंकल।☆
- 9 परमेश्वरं न्हादीपिन्त मनूतय्सं फाये मज्यू।”

☆ 9:47 १:४७ मत्ती ५:२९ ☆ 9:48 ९:४८ यशै ६६:२४ ☆ 9:50 ९:५० मत्ती ५:१३; लूक १४:३४-३५

☆ 10:4 १०:४ व्य २४:१-४; मत्ती ५:३१ ☆ 10:6 १०:६ उत १:२७; ५:२ ☆ 10:8 १०:७-८ उत

10 छैय लिकां वःबलय् चेलातयसं वयकःयाके थ्व हे खँ न्यन।

11 अले वयकलं धयादिल – “सुनानं थः कलाःयात त्वःताः मेम्हलिसे ब्याहा यात धाःसा वं व्यभिचार याःगु जुइ।

12 अथे हे मिसां नं थः भाःतयात त्वःताः मेम्हलिसे ब्याहा यात धाःसा वं व्यभिचार याःगु जुइ।”☆

मस्तयत् आशिष बियादीगु

मती १९:१३-१५; लूक १८:१५-१७

13 लिपा मन्तयसं मस्तयत् येशू आशिष बियादीमा धकाः वयकःयाथाय् हल। चेलातयसं इमित हक्काः छवल।

14 अले येशू तंम्वयाः इमित धयादिल – “मस्तयत् पने मते। इमित जिथाय् छवया हजि, छायाःसा परमेश्वरयागु राज्य थज्याःपिनिगु हे खः।

15 जिं छिमित धात्थे धाये – मस्तयगु नुगः थें दयका मवःपिन्त परमेश्वरयागु राज्यय् दुकाइ मखु।”☆

16 अले वयकलं मस्तयत् घयपुयाः छेनय् ल्हाः तयाः आशिष बियादिल।

तःमिम्ह मन्

मती १९:१६-३०; लूक १८:१८-३०

17 अनं येशू लँय झाया च्वंबलय् छम्ह मनुखं ब्वाँय् ब्वाँय् वयाः वयकःया न्हाःने पुलि चुयाः थथे धकाः न्यन – “भिम्ह गुरूजु, छु ज्या याःसा जितः अनन्त जीवन दइ?”

18 वयकलं लिसः बियादिल – “जितः छाय् भिम्ह धकाः धयागु? भिम्ह ला परमेश्वर छम्ह हे जक दु।

19 व्यवस्थाय् थथे च्वयातःगु सि हे स्यू, मखु ला? स्याये मते, व्यभिचार याये मते, खुइ मते, मखुगु साक्षी बी मते, कर्पिन्त थगय् याये मते, थः मां बौयात हनाबना ति।”☆

20 वं लिसः बिल – “गुरूजु, थ्व फुक्कं मचाबलय् निसें हे मानय् यानाचवनागु दु।”

21 थ्व न्यनाः वयकःयात व खनाः माया वन, अले थथे धयादिल – “अझ नं छं छता याये मानि, थःके दुगु फुक्कं मियाः नये मखंपिन्त इनाब्यु। अले छन्त स्वर्गय् धनसम्पत्ति दइ। थुलि याये धुंकाः जि नाप वा।”

☆ 10:12 १०:११-१२ मती ५:३२; १ कोर ७:१०-११ ☆ 10:15 १०:१५ मती १८:३ ☆ 10:19 १०:१९ प्रस २०:१२-१६; व्य ५:१६-२०

22 थ्व खँ न्यनाः व मनू ख्वाः खिउँसे च्वंकाः दुःख तायाः सुम्क वन, छायाधाःसा व तसकं हे तःमिन्ह खः।

23 अले छचाःखेलं स्वयाः वय्कलं चेलातय्त धयादिल – “तःमिपि मनूतय्त परमेश्वरयागु राज्यय् दुहां वनेत गुलि थाकु।”

24 थ्व खँ न्यनाः चेलात छक्क जुल। वय्कलं हानं धयादिल – “परमेश्वरयागु राज्यय् दुहां वनेत गुलि थाकु।

25 मुलयागु कँय् प्वालय् ऊँट दुहां वनेत अःपुया च्वनी, तर तःमिपि परमेश्वरयागु राज्यय् दुहां वनेत थाकुया च्वनी।”

26 थ्व खँ न्यनाः इपि तसकं हे अजू चाल, अले थःथवय् थथे धकाः खँ ल्हात – “अय्सा सुनां जक उद्धार काये फइ?”

27 वय्कलं इमित स्वयाः धयादिल – “मनूतय्पाखें थथे जुइ फइ मखु, अयनं परमेश्वरं याये मफुगु छुं नं मदु।”

28 पत्रुसं वय्कःयात थथे धाल – “स्वयादिसँ, जिमिसं दुगु फुक्क त्वःताः छिगु ल्यूल्यू वयाच्वना।”

29 वय्कलं धयादिल – “जिं छिमित धाथ्थें धाये – जिगु निति व भिगु खँयागु निति छँबुं, दाजुकिजा, तताकेहें, मांबौ व काय्म्ह्याय् त्वःतावःपिन्त

30 व दुःख स्यूपिन्त आः हे सछिदुगं अप्वः छँबुं, दाजुकिजा, तताकेहें, मांबौ व काय्म्ह्याय् सकलें दइ। अले हानं अनन्त जीवन नं दइ।

31 न्हापा लाःपि लिपा लाइ, अले लिपा लाःपि न्हापा लाइ।”☆

येशुं स्वकः खुसि सीगु खँ धयादीगु

मती २०:१७-१९; लूक १८:३१-३४

32 वय्कःपि अनं यस्शलेमपाखे झाल। येशुं इमिगु न्ह्यः न्ह्यः झायाच्वन। चेलात व वय्कःया ल्यूल्यू वःपि मनूत छक्क जुयाः ग्याग्यां वनाच्वन। येशुं हानं छकः झिनिन्ह चेलातय्त सःताः थःत जुइतिनिगु खँ थथे धकाः कनादिल –

33 “न्यँ, झीपिं यस्शलेमय् वनाच्वनागु दु। अन मनूया काय्यात ज्वनाः तःधांपिं पुजाहारीत व शास्त्रीतयगु ल्हातिइ लःल्हानाबी। इमिसं वयात स्याये हे माः धकाः धाइ। अले वयात यहूदीमखुपिनिगु ल्हातय् लःल्हानाबी।

34 इमिसं वयात यंकाः गिजय् याइ, थुकलं बी, कोरीं दाइ, अले स्यानाछवइ। अयसां स्वन्हु दयकाः व म्वाना वइ।”

याकूब व यूहन्नां बिनति याःगु

मन्ती २०:२०-२८

35 जब्दिया काय्पि याकूब व यूहन्नां वयाः थथे धाल – “गुरूजु, जिमिसं न्हागु प्वंसां छिं जिमित बियादी धकाः जिमिसं मनंतुनागु दु।”

36 वय्कलं न्यनादिल – “धा, जिं छिमित छु याये माल?”

37 इमिसं धाल – “छि जुजु जुयादीबलय् जिमित छिगु जवय् व खवय् तयादिसै।”

38 थ्व न्यनाः वय्कलं धयादिल – “छिमिसं छु पवनाच्चना धयागु थःपिन्सं हे मस्यु। छु जिं त्वनेत्यनागु दुःखयागु ख्वलां छिमिसं त्वने फु ला? जिं काये माःगु दुःखयागु बप्तिस्मा छिमिसं धायेफु ला?”☆

39 इमिसं “फु” धकाः लिसः बिल।

अले वय्कलं इमित धयादिल – “त्वनेत ला छिमिसं नं जिं थें त्वनी, अले बप्तिस्मा कायेत ला छिमिसं नं जिं थें काइ।

40 अयनं जिंके सुयात नं जिगु जवंखवं तयेगु हक मदु। सुयात सुयात तयेगु धकाः ला क्वःछिना तयादी धुंकल।”

41 याकूब व यूहन्नायागु थ्व खँ न्यनाः मेपिं झिम्ह चेलात तंम्वल।

42 अथे जूगुलि वय्कलं इमित थःथाय् सःताः धयादिल – “छिमिसं सि हे स्यु नि, थ्व संसारय् शासन याइपिन्सं मनूतय्त लहातय् काइ। अले इमि नायःतय्सं इमित थः यःथें याना तइ।

43 छिमिगु दथुइ धाःसा थथे जुइ मखु। सुनां तःधं जुइ मास्ति वय्की व छिपिं सकसियां च्यः जुइमाः।☆

44 सुयां न्हापालाके मास्ति वःसा व ला झन दास हे जुइमाः।☆

45 मनूया काय्न् सेवा याकेत मखु, बरु सेवा यायेत व यक्वसित मुक्ति बीत व सीत वःगु खः।”

कांम्ह बारतिमैयात लाय्कादीगु

मन्ती २०:२९-३४; लूक १८:३५-४३

46 अले वय्कःपिं यरीहो थ्यंकः झाल। येशू अनं चेलात व यक्व मनूत नाप झायेत्यंबलय् लँय् छथाय् तिमैया काय् बारतिमै धाःम्ह छम्ह कांम्ह पवगिं च्वनाच्चन।

☆ 10:38 १०:३८ लूक १२:५० ☆ 10:43 १०:४२-४३ लूक २२:२५-२६ ☆ 10:44 १०:४३-४४ मन्ती २३:११; मर्क ९:३५

47 वं नासरतयाम्ह येशू झायाच्चन धयागु न्यना: तत:सलं थथे हाला हल – “दाऊदया काय् येशू, जित: दया यानादिसँ।”

48 मनूतयसं वयात हाले मते धका: ब्व:बिल।

अयनं व झन जक तसकं हाला हल – “दाऊदया काय् येशू, जित: दया यानादिसँ।”

49 थ्व न्यना: वयकलं दिना: धयादिल – “वयात स:ती।”

इमिसं व कांयात थथे धका: स:तल – “साहस या, दँ, वयकलं छन्त स:तादिल।”

50 गागि हे त्व:ता: तिन्हया: व छक्कलं येशूयाथाय् वल।

51 अले वयकलं वयात धयादिल – “जिं छन्त छु याये माल?”

कांन धाल – “गुरूजु, जित: मिखां खंका बियादिसँ।”

52 वयकलं धयादिल – “वा, छंगु विश्वासं छं मिखां खनी।” उघ्रिमय् हे वं मिखां खन, अले व वयक:या ल्यूल्यु वन।

11

येशू यरूशलेमय् झा:गु

मन्ती २१:१-११; लूक १९:२८-४०; यूह १२:१२-१९

1 वयक:पि यरूशलेमया सत्तीक ला:गु जैतून डाँडायागु बेथफागे व बेथानिया धा:गु गामय् थयंक: झा:बलय् येशू निम्ह चेलातयत् थथे धका: 2 खँ स्यना: छवयादिल – “छिपि न्ह्य:नेसं च्वंगु गामय् हँ। अन दुहां वनेवं हे सुनानं मग:निम्ह छम्ह गधया मचायात चिनात:गु खनी। वयात फ्यना: थन हजि।

3 छिमित सुनानं छुं धाल धा:सा, छिमिसं – ‘प्रभुयात माला च्वन’ धका: धा। अले वं बिया हइ।”

4 इपि वना: छम्ह गधया मचायात लँय् ला:गु लुखाय् पिने चिनात:गु खना: इमिसं वयात फ्यन।

5 अन दना च्वंपिन्सं इमित थथे धाल – “गधयात फ्यना: छु यानाच्चनागु हं?”

6 वयकलं स्यना ह: थें इमिसं लिस: बिल। अले इमित गधा बियाहल।

7 इमिसं व गधया मचायात वयक:याथाय् हया: थ:पिनिगु गा वयागु म्हय् लायाबिल। अले वयक: गधया म्हय् च्वनादिल।

8 यक्वसिनं थथ:गु गा हया: लँय् लायाबिल, अले गुलिसिनं ख्यलय् च्वंगु स्याउला ह: हया: लँय् लाय् हल।

9 वयक:या न्ह्य: न्ह्य: वपिं व ल्यूल्यु व:पिं थथे हाल –

“होसन्ना,

प्रभुया नामं झाःम्ह धन्यम्ह खः।✠

10 झी तापाःबाज्या दाऊदयागु

वयाच्वंगु राज्यया

जयजय जुइमा।

स्वर्गय् च्वनादीम्ह परमेश्वरयात

होसन्ना।”

11 थुकथं वय्कः यस्शलेमय् थ्यंकाः अन च्वंगु देगःया चुकय् झाल। छचाःखेलं फुक्कं स्वये धुंकाः लिबाय् धुंक्गुलि वय्कः झिनिम्ह चेलात नाप बेथानियाय् लिहां झाल।

यःमरिमायात सराः बियादीगु

मन्ती २१:१८-१९

12 कन्हय् खुन्हु वय्कःपि बेथानियां झाया च्वंबलय् येशू नयेपित्याकल।

13 तापाकं हे वय्कलं छमा वाँउसे च्वंगु यःमरिमा खनाः उकी छुं सयाच्वंगु दइ ला धकाः स्वः झाल। अन थ्यंकाः छुं हे सया मच्वंगु व हः जक खन। थुबलय् यःमरि सइगु ई मज्जुनि।

14 अले वय्कलं थ्व सिमायात थथे धयादिल – “आवंलि छंगु फल सुनानं नये मखनेमा।” थथे धयादीगु चेलातय्सं नं ताल।

बंजाःतय्त देगलं ख्यानाः छवःगु

मन्ती २१:१२-१७; लूक १९:४५-४८; यूह २:१३-२२

15 वय्कःपि हानं यस्शलेमय् थ्यंकाः झाल। येशू देगलय् झायाः अन च्वनाः मीगु व न्यायेगु ज्या यानाच्वंपि फुक्कसितं ख्यानाः छवयादिल। धिबा हिलीपि सराफितयगु टेबिल ग्वारा तुइकाबिल, सुकुभतु मीपिनिगु ताथ फाता पुइकाबिल।

16 हानं देगःया चुकं जुकाः सुयातं नं छुं यंकेगु हयेगु याकेबिया मदिल।

17 वय्कलं इमित थथे धयाः स्यनादिल – “थ्व खँ च्वयातःगु, मस्यू ला? ‘जिगु छँ फुक्क मन्तय् प्रार्थना याइगु छँ खः।’ छिमिसं ला थुकियात खँ व दाखुँतयगु छँ धकाः यानाच्वन।”✠

18 तःधंपि पुजाहारीत व शास्त्रीतयस्सं थ्व खँ न्यनाः वय्कःयात स्यायेगु ग्वसाः ग्वल। तर मनूत खनाः ग्यानाः इमिसं याये मफुत, छायाधाःसा मनूतयस्सं वय्कःयागु खँ तसकं यय्क्।

19 बहनी जूगुलि वय्कःपि शहरं पिने बेथानियाय् लिहां झाल।

गनावंगु यःमरिमा

मन्ती २१:१८-२२

20 कन्हय् खुन्हु सुथय् वय्कःपि हानं यरूशलेमपाखें वनाच्चंबलय् लँय् यःमरिमा गना च्वंगु खन।

21 अले पत्रुसयात लुमंसे वयाः थथे धाल – “गुरूजु, स्वयादिसँ, छिं सराः बियादीगु सिमा ला गनावने धुंकल।”

22 अले वय्कलं लिसः बियादिल – “परमेश्वरयात विश्वास या।

23 जिं छिमित धात्थें धाये – छिमिसं नं छुं हे संका मयासें थःमहं मतिइ तःगु खँ पूवनी धकाः विश्वास यानाः थ्व पहाडयात ‘ल्यहें दनाः समुद्रय् कुतुं हूँ’ धकाः धाल धाःसा अथे हे जुइ।☆

24 अयजूगुलि जिं छिमित धाये – प्रार्थना यानाः छिमिसं छु पवंगु खः व जितः दये धुंकल धकाः विश्वास यात धाःसा छिमित व द हे दइ।

25 सुनानं छिमित छुं याःगु दुसा प्रार्थना यायेबलय् छिमिसं इमित न्ह्याबले क्षमा या, अले स्वर्गय् च्वनादीमह छिमि परमेश्वर बाःनं नं छिमित अथे हे क्षमा याइ।

26 छिमिसं वयात क्षमा मबिल धाःसा छिमि स्वर्गय् च्वनादीमह बाःनं नं छिमिसं याःगु पाप क्षमा यानादी मखु।”

येशूयात सुनां अधिकार बियातल धकाः न्यंगु

मन्ती २१:२३-२७; लूक २०:१-८

27 वय्कःपि हाकनं यरूशलेमय् थ्यंकः झाल। येशू देगःया चुकय् चाःहिला च्वनादीबलय् तःधंपि पुजाहारीत, शास्त्रीत, व थकालिपिन्सं वयाः वय्कःयात

28 थथे धाल – “छिं थथे याना दित गनं अधिकार कयादिया? अले छितः थ्व अधिकार सुनां बिल?”

29 वय्कलं इमित धयादिल – “जिं नं छिमिके छगू खँ न्यने, छिमिसं लिसः बिल धाःसा जितः सुनां थ्व अधिकार बियाहःगु खः धकाः धाये।

☆ 11:23 ११:२३ मन्ती १७:२०; १ कोर १३:२

30 बत्तिस्मा बीगु अधिकार यूहन्नां सुयापाखें काल? स्वर्गपाखें ला कि मन्तयपाखें?”

31 थ्व न्यना: इमि थःथवय् थथे खँ जुल – “स्वर्गपाखें काःगु धाल कि झन झीत वं ‘अयसा, छिमिसं वयात छाया विश्वास मयानागु लय?’ धका: धाइ।

32 मन्तयपाखें काःगु धाल कि मन्तयसं झीत स्याइ, छायाधाःसा फुक्कसिनं यूहन्नायात अगमवक्ता धका: मानय यानातःगु दु।”

33 थथे जूगुलि इमिसं वय्कःयात लिसः बिल – “जिमिसं मस्यू।”

अले वयकलं धयादिल – “अयसा, जिं नं छिमित थ्व ज्या यायेत जितः सुनां अधिकार बियाहःगु खः धका: धाये मखु।”

12

मभिपि म्हयतयगु उखान

मन्ती २१:३३-४६; लूक २०:१-१९

1 थुलि धयादी धुंका: वयकलं इमित छपु उखान छुनादिल। “छम्ह तःसिं दु। वं थःगु क्यबय् दाख पित। अले प्यखें वालं चिनाबिल। वं अन दाख तिसिगु साः नं तयाबिल। अले क्यब स्वयेत छखा बल्चा नं दय्का थकल। क्यबय् ज्याका: व मेगु देशय् वन।☆

2 बाली कायेगु ई जुइका: दाखक्यबया थुवालं थः च्यःयात म्हयतयथाय् बाली कायके छवल।

3 इमिसं व च्यःयात ज्वना: दाल, अले छुं हे बिया मछवसें खालि लहातं तुं लित छवयाबिल।

4 दाखक्यबया थुवालं हानं मेम्ह च्यःयात छवयाहल। वयात नं इमिसं दाया: छेनय् घाःपा: याना: बेइज्जत याना: छवयाबिल।

5 वं हानं मेम्ह च्यः छवयाहल, थ्वयात ला इमिसं स्याना हे बिल। थुकथं इमिसं गुलिसितं दायाछवत, गुलिसितं ला स्या हेस्यात।

6 दाखक्यबया थुवाःया थः हे यःम्ह काय् छम्ह जक बाकि दनि। दकलय् लिपा थःकाय्यात हे वं थथे मतिइ तया: म्हयतयथाय् छवल – ‘जि काय्यात ला इमिसं हनाबना हे तइ।’

7 “म्हयतयसं ला झन जक हे थथे ग्वसा: ग्वल – ‘थ्व ला तःसिया हे काय् खः, थ्वयात स्याना: फुक्क धनसम्पत्ति थःगु याना काये।’

- 8 इमिसं कायम्हयसित ज्वनाः स्यात, अले बुं पिने वान्छवया बिल।”
 9 येशू इमिके न्यनादिल – “दाखक्यबया थुवालं थुमित आः छु याइगु जुइ? वं
 वयाः फुक्कसितं स्यानाः क्यब मेपिन्त हे ज्याके बी।
 10 थथे च्वयातःगु खँ छिमिसं मब्बना ला?

- “ दकःमितयसं ज्यालगय् मज्जू
 धकाः धाःगु ल्वहं हे
 मू ल्वहं ज्वल।
 11 परमेश्वरं हे थथे यानादीगु खः।
 झीसं स्वयेबलय्
 थ्व तसकं अजू चायापु!” ☆

12 वय्कलं कनादीगु थ्व उखान न्यनाः इमिसं थःपिन्त हे धयाकाः धयादीगु खः
 धकाः थुइका काल। अले इमिसं वय्कःयात ज्वनेत स्वल। अयनं इमिसं मनूत खनाः
 ग्यानाः ज्वने मछाल, अले इपिं सुम्क वनाछवत।

कर पुलेगु खँ

मन्ती २२:१५-२२; लूक २०:२०-२६

13 अले इमिसं येशूयात खँय् काकाः ज्वनेगु ग्वसाः ग्वयाः सुं फारिसीत व हेरोदया
 मनूत छवयाहल।

14 इमिसं वयाः वय्कःयात थथे धाल – “गुरूजु, छि धात्थे भिंम्ह मनु खः।
 छिं मनूतय्त परमेश्वरयागु भिंगु लँपु जक क्यनादी। मनूतयसं धाइ ल्हाइगु खँय् छिं
 च्यूताः तयामदी, छायाधाःसा छिं ख्वाः स्वयाः खँ ल्हानामदी। छता खँ धयादिसँ,
 कैसरयात झीसं कर पुले ज्यू ला कि मज्यू? कर पुले ला कि मपुले?”

15 वय्कलं इमिगु मभिगु बिचाः थुइकाः धयादिल – “जितः छाय् काय्केत
 स्वयागु? धिबा छगः हयाः जितः क्यँ।”

16 इमिसं छगः धिबा हयाः वय्कःयात क्यन। वय्कलं न्यनादिल – “थुकी
 सुयागु ख्वाः व नां क्रियातःगु दु?”

इमिसं “कैसरयागु” धकाः लिसः बिल।

17 वय्कलं धयादिल – “अयसा, कैसरयागु कैसरयात हे ब्यु, परमेश्वरयागु
 परमेश्वरयात हे ब्यु।”

वय्कःयागु खँ न्यनाः इमि व धाये थ्व धाये मन्त।

सीपि म्वानावइगुयात कयाः न्ह्यसः

मन्ती २२:२३-३३; लूक २०:२७-४०

18 उखुन्ह हे सिनाः म्वाना वइगु खँय् विश्वास मयाइपि सदुकीतय्सं वयाः
येशूयाके थथे धकाः न्यन —☆

19 “गुरुज्जु, सुं मनू मस्त मदय्कं सिनावन धाःसा वया हे किजां थः तताःजुयात
कलाः तयाः दाजुम्हय्सिगु निति मस्त दय्केमाः धकाः मोशां च्वया थकूगु दु।”☆

20 न्हय्मह दाजुकिजापि दु। तःधिकःम्ह दाजुम्ह ब्याहा यानाः मस्त मदय्कं हे
सिनावन।

21 अले दातिम्ह किजां तताःजुम्हय्सित कलाः तल। दातिम्ह नं मस्त मदय्कं हे
सिनावन। थथे हे साहिलाम्हय्सिनं नं यात।

22 थुकथं हे वयां क्वय्यापि नं फुक्कं मस्त मदय्कं सिनावन। दकलय् लिपा व
मिसा नं सित।

23 आः धयादिसँ, सीपि म्वाना वइबलय् व मिसा सुया कलाः जुइ, छायाधाःसा
इपि न्हय्महय्सिनं नं वयात कलाः तःगु दु।”

24 थ्व न्यनाः वय्कलं धयादिल — “छिमिसं तसकं टुंकाच्चन, छायाधाःसा
छिमिसं धर्मशास्त्रयागु खँ व परमेश्वरयागु शक्ति हे मथूनि।

25 सीपि हानं म्वाना वइबलय् इपि स्वर्गादूतत थें जुइ। उबलय् सुयागु ब्याहा नं
जुइ मखु, सुयातं बिया नं छवइ मखु।

26 “सीपि म्वाना वइ धयागु खँ छु छिमिसं परमेश्वरं मोशायात च्यानाच्वंगु झालं
थथे धयादीगु मब्वना ला? — ‘जि अब्राहामया, इसहाकया व याकूबया परमेश्वर
खः।’”☆

27 थुकियागु अर्थ वय्कः सीपिनि परमेश्वर मखु, बरु म्वाःपिनि परमेश्वर खः।
छिमिसं तसकं टुंकाच्चन।”

दक्वसिबय् तःधंगु आज्ञा

मन्ती २२:३४-४०; लूक १०:२५-२८

28 छम्ह शास्त्री वय्कःपि अथे हालाच्वंगु न्यनाच्वंगु जुयाच्चन। वय्कलं इमित
पाय्छि पाय्छि जुइक लिसः बियादीगु न्यनाः वं नं वय्कःयात थथे धकाः न्यन —
“व्यवस्थाय् दकलय् तःधंगु आज्ञा छु खः?”

29 वय्कलं लिसः बियादिल – “दकलय् तःधंगु खँ थ्व खः – ‘हे इस्माएलीत न्यँ! परमप्रभु झी परमेश्वर छम्ह हे जक दु।

30 छिमिसं परमप्रभु झी परमेश्वरयात दुनुगलंनिसें माया या, थःगु प्राण बिया तकं माया या, थःगु मननिसें माया या, अले थःगु बलं फतले माया या।”☆

31 निग्गु तःधंगु आज्ञा थ्व खः – ‘थः जःलाखःलायात थःत थें माया या।’ थ्व थें ज्याःगु तःधंगु आज्ञा छुं हे मदु।”☆

32 अले व शास्त्री वय्कःयात धाल – “गुरूजु, छिं धयादीगु खँ ला धाथ्यें हे खः। परमेश्वर छम्ह हे जक दु। अले वय्कः बाहेक मेम्ह मदु धकाः ला छिं खःगु हे खँ धयादिल।”☆

33 अथे ज्गुलि परमेश्वरयात दुनुगलंनिसें वाःचाय्काः माया यायेगु, अले बलं फतलय् माया यायेगु, अले हानं जःलाखःलायात थःत थें माया यायेगु ला बलि बीगु व होमबलि स्वयाः तसकं भिं।”☆

34 वयागु थज्याःगु बुद्धिं जाःगु लिसः न्यनाः वय्कलं धयादिल – “छ परमेश्वरयागु राज्यं तापाः मजू।” उबलय् निसें वय्कःयाके सुनानं छुं हे न्यं वये मछाल।”☆

मुक्ति बीम्ह ख्रीष्ट सु खः?

मती २२:४१-४६; लूक २०:४१-४४

35 येशू देगलय् स्यनेकने यानादीबलय् थथे न्यनादिल – “शास्त्रीतय्सं गथे यानाः मुक्ति बीम्ह ख्रीष्ट दाऊदया काय् खः धकाः धाये फइ?

36 पवित्र आत्मां जायाः दाऊद थःम्हं हे थथे धयावंगु खः –

“ छं शत्रुतय्त छंगु पालि तःले मततले

छ जिगु जवय् च्वनाच्चँ धकाः

परमप्रभुं जिमि प्रभुयात धयादिल।”☆

37 “दाऊदं हे अथे वयात ‘प्रभु’ धकाः धाल धाःसा वय्कः गथे यानाः दाऊदया काय् जुइ फइ?” ग्वाः ग्वाः मनूतय्सं वय्कःयागु खँ लयल्यतातां न्यनाच्चन।

☆ 12:30 १२:२९-३० व्य ६:४-५ ☆ 12:31 १२:३१ लेवी ११:१८ ☆ 12:32 १२:३२ व्य ४:३५

☆ 12:33 १२:३३ होशे ६:६ ☆ 12:34 १२:२८-३४ लूक १०:२५-२८ ☆ 12:36 १२:३६ भज ११०:१

शास्त्रीत खना: होश या
मती २३:१-३६; लूक २०:४५-४७

38 वयकलं धयादिल — “शास्त्रीत खना: होश या। थुपि तत:पा:गु लं फिना:
बजारय वनीबलय फुक्कसिनं मानय याका जुइत स्वइ।

39 भ्वजय् इपि च्वय् च्वना जुइ, अले धर्मशास्त्र स्यनीगु छँय् इपि न्ह्य:ने च्वनेगु
स्वइ।

40 इमिसं भा:त मदुपि मिसातयगु छँ लुतय् यानाच्वंगु दु। मनूतयत् क्यनेत धा:सा
ता:हाकयक प्रार्थना याना जुइ। उकिं इमित मेपिन्त स्वया: अप्व: सजाँय बी।”

विधवा मिसां छा:गु धिबा
लूक २१:१-४

41 अले वयक: देग:या धुकू न्ह्य:ने फ्यतुना: मनूतयसं चन्दा त:गु स्वयादिल।
त:मिपि मनूतयसं धिबा नं यक्व तया वं।

42 छम्ह चीमिम्ह विधवा मिसां नं वया: सिज:यागु निग: चुन्नाचा तया वन।

43 थ्व खना: वयकलं चेलातयत् स:ता: धयादिल — “जिं छिमित धात्थें धाये —
धुकुतिइ धिबा छा:व:पि मध्ये दकलय् अप्व: धिबा छा:म्ह ला थ्व चीमिम्ह विधवा
मिसा ख:।

44 छाय्धा:सा मेपिन्सं ला इमिके यक्व दुगुलि अ:पुक बियावन। थ्व मिसां ला
थ:के दुगु फुक्कं नयेत मदय्क हे बियावन।”

13

दु:खकष्ट जुइतिनिगु खँ

मती २४:१-१४; लूक २१:५-१९

1 येशू देगलं पिने झा:बलय् चेलात मध्ये छम्हयसिनं वयक:यात धयादिल —
“गुरुजु, स्वयादिसँ, गपाय् गपाय्ख:गु ल्वहँतं दयकात:गु तत:खा:गु छँ।”

2 वयकलं लिस: बियादिल — “छु छिमिसं थ्व तत:खागु छँ खना ला? थुपि
फुक्कं दुना वना: ल्वहं छग: नं दइ मखुत।”

3 वयक: देग:या न्ह्य:ने ला:गु जैतून डाँडाय् फ्यतुना च्वनादीबलय् पत्रुस, याकूब,
यूहन्ना व अन्द्रियासं वया: सुनानं मसीक वयक:याके थथे धका: न्यन —

4 “छिं धयादी थें गुबलय् जुइ? अले थथे गुबलय् जुइ धका: जिमिसं गथे याना:
सीकेगु?”

5 वयक्कलं धयादिल – “होश यानाच्चँ, सुनानं छिमित मिखाय् धुलं छावाके मफयेमा,

6 छायाधाःसा यक्व हे मनूतयसं वयाः – ‘जि मुक्ति बीम्ह खीष्ट खः’ धकाः छिमिगु मिखाय् धुलं छावाकेत स्वइ।

7 न्यँ, छिमिसं जवखवं तसकं ल्वापु जूगु व ल्वापु जुइत्यंगु खँ न्यनी। अयसां, छिपि ग्याये मते, छायाधाःसा थथे जुइ हे माः। थथे जुइवं संसार नाश जुयावनी मखु।

8 देश देशतयगु दथुइ ल्वापु जुइ। राज्य राज्ययागु दथुइ ल्वापु जुइ। प्यखें अनिकाल जुइ, अले भवखाय् ब्वइ। थ्व ला दुःखकष्टयागु छुमां जक खः।”

9 “न्हागु जूसां छिमिसं होश यानाच्चँ। इमिसं छिमित अदालतय् यंकी, धर्मशास्त्र स्यनीगु छँय् नं छिमिसं दायकाः च्वनेमाली। जितः विश्वास याःगुलि छिमित हाकिमत व जुजुपिनिगु न्ह्यःने थने यनी, अले छिमिसं जिगु नामय् साक्षी बी माली।

10 न्ह्याथे यानाः सां भिगु खँ फुक्क संसारय् न्यके हे माः।

11 छिमित ज्वना यंकीबलय् छिमिसं छु धायेगु धकाः धन्दा काये म्वाः। छिमित अबलय् गथे धाय्की अथे हे धा, छायाधाःसा अबलय् छिमिसं मखु, बरु छिमिके दीम्ह पवित्र आत्मां हे नवानादी।✱

12 “थुबलय् मनूतयसं थः हे दाजुकिजापिन्त महियाः स्याके बी। बौनं थः हे काय् म्हायपिन्त, अले काय् म्हायपिन्सं थः हे मां बौयात महियाः स्याके बी।

13 थथे जिगु नामं यानाः छिमित फुक्कसिनं हेला याइ। लिपा तकं क्वातुक विश्वास यानाः सह यानाच्चंम्ह धाःसा बचय् जुइ।”✱

यस्शलेम नाश जुइतिनि

मती २४:१५-२८; लूक २१:२०-२४

14 थ्व खँ ब्वंम्हयसिनं थुइमा – “नाश याइगु घच्चायापुगु खँ गन मदयेमाःगु खः अन दनाचवंगु छिमिसं खनेवं यहदियाय् च्वनाच्चंपि पहाडय् बिस्सुं वनेमा।✱

15 छँय्या कःसिइ च्वनाच्चंपिन्सं थःगु मालसामान कायेत तकं क्वहां वने लाइ मखु।✱

16 बुँइ ज्या याना च्वंपिन्सं थःगु वसः कायेत तकं छँय् वने लाइ मखु।

17 प्वाथय् दुपिं व दुस्त्वंम्ह मचा दुपिं मिसातय्त तसकं सास्ती जुइ।

✱ 13:11 १३:९-११ मती १०:१७-२०; लूक १२:११-१२ ✱ 13:13 १३:१३ मती १०:२२ ✱ 13:14 १३:१४ दान १:२७; ११:३१; १२:११ ✱ 13:15 १३:१५ लूक १७:३१

18 चिकुलाबलय् व विश्रामबार खुन्हु थथे मजुइमा धकाः परमेश्वरयात प्रार्थना याना च्वँ।

19 उबलय् तसकं सास्ती जुइ। सृष्टि जूबलय् निसें आः तकं थपाय्स्कं सास्ती जूगु मदुनि। अले लिपा नं गुब्सं जुइ मखु।✧

20 परमेश्वरं व ईयात चिहाकयका मदीसा सुं हे बचय् जुइ मखु। वय्कलं थःमहं ल्ययातःपिं मनूतय्गु निंति व ईयात चिहाकयकादी।

21 “उबलय् सुनानं ‘मुक्ति बीम्ह ख्रीष्ट थन दु, अन दु’ धकाः धाल धाय्वं छिमिसं पत्याः याये मते,

22 छायाःसा उबलय् फताहा ख्रीष्ट व अगमवक्तात खनेदय्कः वइ। इमिसं फतिफतलय् परमेश्वरं ल्ययातःपिं मनूतयत् झंगःलायत् ततःधंगु चिं व अजू चायापुगु ज्या यानाक्यनी।

23 छिपिं होश यानाः च्वनाच्वँ, थथे जुइतिनि धकाः जिं छिमित न्हापां हे धयाबियागु दु।”

मनूया काय् झाइबलय् थथे जुइ

मन्ती २४:२९-३१; लूक २१:२५-२८

24 “अबलय् थथे दुःखकष्ट जुइ धुनेवं –

“सूर्य खिउँया वनी, तिमिला बुलुयावनी।✧

25 आकाशय् च्वंगु नगु कुतुं वनी।

अले आकाशय् च्वंगु शक्ति खाइ।’✧

26 “अबलय् मनूया काय् तःधंगु शक्ति ज्वनाः झःझः धाय्क सुपाँचय् खनेदय्कः वइ।✧

27 वय्कलं थः स्वर्गदूततयत् पृथ्वीया प्यखें छवयाः ल्ययातःपिन्त छथाय् मुंकी।”

यःमरिमायागु उखान

मन्ती २४:३२-३५; लूक २१:२९-३३

✧ 13:19 १३:१९ दान १२:१; प्रस ७:१४ ✧ 13:24 १३:२४ यशै १३:१०; इज ३२:७; योए २:१०,३१; ३:१५; प्रका ६:१२ ✧ 13:25 १३:२५ यशै १३:१०; ३४:४; योए २:१०; प्रका ६:१३ ✧ 13:26 १३:२६ दान ७:१३; प्रका १:७

- 28 “यः मरिमापाखें छिमिसं छता खँ सीकि। थुकी चुलि जायावल कि वर्षा वल धकाः छिमिसं सी।
- 29 अथे हे जिं धया थें जुयावल कि छिमिसं मनूया काय् वइन धकाः सीकि।
- 30 जिं छिमित धाथें धाये – आःयापिं मनूत सिनावने न्ह्यः हे जिं धया थें जुइ।
- 31 आकाश व पृथ्वी मदयावनी, अयनं जिगु वचन गुबलें मदयावनी मखु।”
- 32 “थथे गुबलय् व गुखुन्हु जुइ धकाः सुनानं मस्यु। स्वर्गय् च्वंपिं स्वर्गदूततयसं, अले परमेश्वरया कायनं हे नं थ्व खँ मस्यु। परमेश्वर बाःनं जक स्यु।
- 33 अयजूगुलि होशयानाच्वँ, छायाधाःसा थथे गुबलय् जुइ धकाः छिमिसं मस्यु।
- 34 “थ्व खँ ला परदेशय् वनेत्यंम्ह मनू थें खः। वं थः च्यःतयूत ‘छेंयागु ज्या बांलाक या,’ अले लुखाय् पाः च्वनीम्हयसित ‘छेंय बांलाक स्व’ धकाः धाइ।☆
- 35 छिमिसं नं अथे हे होश यायेमाः, छायाधाःसा छँ थुवाः गुबलय् लिहां वइ धकाः छिमिसं मस्यु। बहनी वइ ला, चान्हय् वइ ला, खा हालीबलय् वइ ला, सुथय् वइ ला, सुनां छु स्यु?
- 36 आकाझाकां वइबलय् वं छिपिं घनाच्वंगु मलायेमा।
- 37 जिं छिमित धयाच्वनागु खँ फुक्कसितं धयाच्वनागु दु – ‘होशयानाच्वँ।’ ”

14

बेथानियाय् येशूयात चिकनं लूगु

मत्ती २६:६-१३; लूक १२:१-८

- 1 छुत्काराया नखः व सोडा मतःगु मरि नयेगु नखः निन्हु जक मानि। तःधंपिं पुजाहारीत व शास्त्रीतयसं येशूयात गथे यानाः ज्वनाः स्यायेगु धकाः ग्वसाः ग्वयाच्वन।☆
- 2 इमिसं थथे मतिइ तल – “थ्व ज्या नखःबलय् याये मज्यु, मखुसा तसकं ल्वापु जुइ।”
- 3 छन्हु येशू बेथानियाय् सिमोन कोहियागु छेंय् भवय् नयेत झाःबलय् छम्ह मिसा दुस्त्वहंयागु थलय् शूद्रगु तसकं थिकेगु व नस्वाःगु चिकं ज्वनाः वल। अले थलयाःगु पुसा चायेकाः वं चिकनं येशूया छैनय् लुनाबिल।☆
- 4 थ्व खनाः अन दुपिं गुलिसिनं तंम्वयेकाः थथे धाल – “छाय् अपायसकं थिकेगु चिकं सिति छवःगु जुइ?

5 थ्व चिकं म्यगु जूसा स्वसः दिनार वइ। अले थ्व धिबा नये मखंपिन्त इनाब्यगु जूसा ज्यगु नि।” थुकथं इमिसं व मिसायात तसकं ब्वःबिल।

6 अले वयकलं धयादिल – “छिमिसं थ्व मिसायात छाय् हायेका च्वनागु? वं जितः छु यात बां हे लाःगु यात।

7 नये मखंपिं ला छिपिनाप न्हाबले दयाच्चनी, अले छिमिसं यःबलय् इमित भिंगु याये फु। तर जि न्हाबले दइ मखु।*

8 थ्व मिसां जिगु निति थःमहं याये फुगु यात। जिगु म्हायात थुनेत वं न्ह्यः हे चिकनं लुनाबिल।

9 जिं छिमित धात्थे धाये – गन गन भिंगु खँ न्यकी, अन अन थ्व मिसां याःगु थ्व खँ नं लुमकेत न्ह्यथनी।”

यहदां येशूयात ज्वंकेत स्वःगु

मती २६:१४-१६; लूक २२:३-६

10 झिंनिम्ह चेलात मध्ये छम्ह यहदा इस्करियोत तःधंपि पुजाहारीतयथाय् वनाः येशूयात गथे यानाः ज्वंकाछवयेगु धकाः सल्लाह याः वन।

11 थ्व खँ न्यनाः इमिसं तसकं हे लय्लय्तायाः वयात धिबा बी धकाः धयाहल। अनंनिसैं वं वयकःयात ज्वंका छवयेत सनाच्चन।

चेलात नाप छुत्कारायागु नखः हनादीगु

मती २६:१७-२५; लूक २२:७-१३

12 सोडा मतःगु मरि नयेगु नखःया न्हापां खुन्हु, चीधिकःम्ह भ्याःचा स्याइ खुन्हु हे चेलातयसं वयकःयाके थथे धकाः न्यन – “छिगु नितिं गन वनाः छुत्काराया नखःया भवय् ज्वरय् याये?”

13 वयकलं निम्ह चेलातयत थथे धयाः छ्वयादिल – “छिपिं शहरय् हूँ, अन छिमिसं घलय् लः कयावयाच्चम्ह छम्ह मनूयात नापलाइ। छिपिं व हे मनूया ल्यूल्यु हूँ।

14 व दुहां वंगु छँया थुवाःयात थथे धा – ‘छितः गुरुं थथे धया हयादीगु, “जि जिमि चेलात नाप च्वनाः छुत्काराया नखःया भवय् न्याय्केगु क्वथा गुगु खः?’”

15 अले वं छिमित भवय् ज्वरय् यायेत माःगु फुक्कं दुगु तलय् च्वंगु तःधंगु क्वथाय् यंकाः क्यनी, छिमिसं अन हे भवय् ज्वरय् या।”

* 14:7 १४:७ व्य १५:११

16 चेलात निम्ह शहरय वन, अन इमिसं वयकलं धाःथें फुक्कं लुइकल। अले इमिसं अन हे छुत्काराया नखःया भवय ज्वरय यात।

17 बहनी जूबलय येशू झिनिम्हं चेलात ब्वनाः झाल।

18 नयाच्चंबलय वयकलं थथे धयादिल – “जिं छिमित धात्थें धाये, छिपिं मध्ये हे जि नाप नयाच्चंम्ह छम्हयसिनं जितः धोखा बी।”✱

19 थ्व न्यनाः इमिसं तसकं नुगः मछिंकल। अले छम्ह छम्हयसिनं थथे धाल – “छिं जितः हे धयादियागु ला मखु प्रभु?”

20 वयकलं धयादिल – “छिपिं झिनिम्ह मध्ये छम्ह, जि लिसे भुइ मरि थुनाः नयाच्चंम्ह।

21 धर्मशास्त्रय च्वया तः थें मन्या काय ला सिना हे वनेमाः। अयनं वयात ज्वंका छवइम्ह मन्यात ला तसकं तसकं हे धिक्कार दु। व बु हे मबगु जूसा तसकं बांलाइगु खः।”

प्रभु भवय

मती २६:२६-३०; लूक २२:१४-२३

१ कोर ११:२३-२५

22 नयाच्चंबलय येशू मरि कयाः परमेश्वरयात सुभाय बियाः कुचा थलादिल। अले चेलातयत् इनाः थथे धयादिल – “थ्व मरि कयाः न, थ्व जिगु म्ह खः।”

23 अथे हे वयकलं ख्वला नं कयाः परमेश्वरयात सुभाय बियाः इमित बियादिल, अले इपिं फुक्कसिनं थुकिं हे त्वन।

24 अले वयकलं इमित धयादिल – “थ्व जिगु न्हगु बाचायागु हि खः। थ्व हे हिं यक्वसिगु पाप क्षमा जुइ।”✱

25 जिं छिमित धात्थें धाये – परमेश्वरयागु राज्यय न्हकथं दाखरस मत्वंतले जिं आवंनिसें दाखरस त्वने मखुत।”

26 अले छपु भजन हालाः वयकःपिं जैतून डाँडाय झाल।

पत्रुसं येशूयात म्हमस्यू धकाः धाइ

मती २६:३१-३५; लूक २२:३१-३४; यूह १३:३६-३८

27 येशू इमित धयादिल – “छिपिं फुक्कं जितः त्वःताः बिस्सुं वनी। धर्मशास्त्रय नं थथे च्वयातःगु दु –

“जिगु ज्या याइम्ह फैजवाःयात हमला या, वयात स्या।
अले फैत उखेलाः थुखेलाः जुइ।”☆

28 “अयनं जि हानं म्वाना वयाः छिपिं स्वयाः न्हापा हे गालील्य् थ्यंकः वने।”☆

29 पत्रुसं वय्कःयात धाल – “फुक्कसिनं त्वःता वंसां जिं ला छितः गुब्सं हे त्वःते मखु।”

30 अले वय्कलं धयादिल – “जिं छन्त धाल्थें धाये – थौं चान्हय् हे छं जितः
खा हाले न्ह्यः स्वकः तक म्हमस्य् धकाः धाइ।”

31 अयनं वं पाफयाः धाल – “छिनाप सी हे माःसां जिं छितः म्हमस्य् धकाः
धाये मखु।” फुक्क चेलातय्सं नं अथे हे धाल।

गेतसमनिइ प्रार्थना यानादीगु

मन्ती २६:३६-४६; लूक २२:३९-४६

32 वय्कःपिं गेतसमनिइ थ्यने धुंकाः येशू इमित धयादिल – “जि प्रार्थना
यानाच्चवंतले छिपिं थन हे च्वनाच्चवँ।”

33 वय्कलं पत्रुस, याकूब व यूहन्नायात जक ब्वना यंकादिल। उबलय् वय्कलं
तसकं हे नुगः मछिकाः दिक्क जुयादिल।

34 वय्कलं इमित धयादिल – “नुगः हीसे च्वनाः जिगु छाति हे तज्याइ थें
च्वनाच्चन। छिपिं मघंसे थन हे च्वनाच्चवँ।”

35 भचा उखे झायाः बँय् क्वपुसां पुयाः वय्कलं थथे धकाः प्रार्थना यानादिल –

36 “अब्बा, बाः, छिं याये मफुगु छुं नं मदु। थ्व दुःखयागु ख्वला जिथासं
चीकादिसँ। अयनं जितः यःथें यानादी मते, छितः यःथें हे यानादिसँ।”

37 अले वय्कः स्वम्ह चेलात च्वनाच्चंथाय् लिहां झाल। इपिं ला घना च्वने
धुंकल। अयज्गुलि वय्कलं पत्रुसयात धयादिल – “सिमोन, छ घने धुनागु ला?
घौछि हे मघंसे च्वने मफु ला छिपिं?”

38 मघंसे प्रार्थना याना च्वँ, मखुसा छिपिं जाँचय् लाइ। आत्मा ला तयार दु, म्ह
धाःसा बमलाः।”

39 अनं वनाः वय्कलं हानं न्हापा थें तुं प्रार्थना यानादिल।

40 वय्कः लिहां झाःबलय् इपिं हानं न्ह्यः वय्काच्चन। इमिगु मिखा न्ह्यः वःगुलि
इयातुसे च्वनाच्चन। इमि वय्कःयात छु धाये छु धाये जुल।

41 स्वकःया पालय् झायाः वय्कलं इमित थथे धयादिल – “छिपि आः तं घना च्वनातिनि ला? मनूया काय्यात पापीतय्सं ज्वनेगु ई वये धुंकल।

42 दँ, नु! स्व, जितः ज्वंकीम्ह मनू थ्यंकः वये धुंकल।”

येशूयात ज्वंगु

मती २६:४७-५६; लूक २२:४७-५३; यूह १८:१-११

43 वय्कलं थथे धयाच्चनादीबलय् हे झिंनिम्ह मध्ये छम्ह चेला यहूदा अन थ्यंकः वल। व नाप तःधंपि पुजाहारीत, शास्त्रीत व थकालितय्सं छवयाहःपि नं दु। इमिसं तरवार व कथि ज्वनातःगु दु।

44 “जिं चुप्पा नयाम्ह मनू हे येशू खः, छिमिसं वयात ज्वँ” धकाः यहूदां इमित खँ स्यना हःगु दु।

45 उकिं वं वय्वं हे येशूयाथाय् वनाः – “गुरुजु” धयाः वय्कःयात चुप्पा नल।

46 अले ज्वं वःपिन्सं वय्कःयात ज्वन।

47 वय्कःया लिकक दनाच्चंम्ह छम्ह मनुखं थःगु तरवार लिकयाः दकलय् तःधंम्ह पुजाहारीया छम्ह दासयागु न्हाय्पं हे ध्यनाबिल।

48 अले येशू ज्वं वःपिं मनुतयत धयादिल – “जि छम्हयसित ज्वनेत थथे तरवार व कथि ज्वनावये माःगु छाय्? छु जि दाखुँ खः ला?

49 देगलय् च्वनाः न्हियान्हिथं स्यनेकने याना जुयाबलय् छिमिसं जितः छाय् मज्वनागु? धर्मशास्त्रय् च्वयातःगु पूवनेमा धकाः हे थथे जूगु खः।”☆

50 अले चेलात फुक्क उखेलाः थुखेलाः मदय्क बिस्सुं वन।

51 गा छपुं जक न्ययातःम्ह छम्ह ल्याय्म्हम्ह मनू येशूया ल्यूल्यु वन। इमिसं वयात नं ज्वने त्यंबलय्

52 गा हे त्वःताः व नांगां बिस्सुं वन।

महासभाया न्ह्यःने येशू

मती २६:५७-६८; लूक २२:६६-७१; यूह १८:१३-१४,१९-२४

53 इमिसं येशूयात दकलय् तःधंम्ह पुजाहारीयाथाय् यंकल। तःधंपि पुजाहारीत, थकालित व शास्त्रीत फुक्कं अन मुनाच्चंगु दु।

54 पत्रुस नं तातापाकं हे ल्यूल्यु वनाः दकलय् तःधंम्ह पुजाहारीयागु चुकय् थ्यंक हे वन। पत्रुस अन वनाः पालेत नाप मि पनाच्चन।

55 तःधर्षिं पुजाहारीत व सभाय् च्वंपिं फुक्कसिनं जानाः येशूयात गथे यानाः स्यायेगु धकाः दोष माला च्वन, अयनं छुं हे दोष लुइके मफु।

56 यक्व हे मनूतयसं वयक्ःयात मखुगु मखुगु द्वपं बिल। अयनं इमिगु खँ हे मिलय् मजू।

57 गुलिसिनं ला अन दनाः थथे धकाः मखुगु खँ धायेत स्वल –

58 “थ्व मनूखं थथे धाःगु ला जिमिसं ताया – ‘ल्हाति दय्कातःगु थ्व देगःयात जिं थुनाः स्वन्हं हे हानं ल्हाति दय्किगु मखुगु देगः दना बी।’ ”☆

59 थुकी नं इमिगु खँ मिलय् मजुल।

60 अले दकलय् तःधंम्ह पुजाहारीं फुक्कसिगु न्ह्यःने दनाः वयक्ःयात थथे धकाः न्यन – “छु छाय् न्वःमवासे च्वनागु? थुमिसं धाःगु खँय् छं छुं धायेमाःगु दु ला?”

61 वय्कलं छुं हे धयामदी। हानं दकलय् तःधंम्ह पुजाहारीं वयक्ःयात न्यन – “छु दकलय् धन्यम्हयसिया काय् मुक्ति बीम्ह खीष्ट खः ला?”

62 वय्कलं धयादिल – “खः, जि हे खः, छिकपिन्सं हे मनूया काय् परमेश्वरया जवय् च्वनाच्वंगु व आकाशय् च्वंगु सुपाँचय् वयाच्वंगु खनी।”☆

63 थ्व न्यनाः दकलय् तःधंम्ह पुजाहारीं थःम्हं फिनातःगु लं हे खुनाः थथे धाल – “थ्वयां अप्वः मेगु दसि हे छु मानि?”

64 थ्वं परमेश्वरयात क्वह्यकूगु छिमिसं ता हे ताल। छिमिगु छु बिचाः दु?”

इमिसं “वयात स्याना हे छवयेमाः” धकाः धाल।☆

65 अले ला गुलिसिनं वयक्ःयागु ख्वालय् थुकलं बिल। गुलिसिनं वयक्ःयागु मिखा त्वपुयाः दायाः थथे धाल – “का धा, छन्त सुनां दाल?” अले सिपाइतयसं वयक्ःयात दायाः यंकल।

पन्नुसं येशूयात म्हमस्यू धकाः धाःगु

मती २६:६९-७५; लूक २२:५६-६२; यूह १८:१५-१८, २५-२७

66 पन्नुस कुने चुकय् च्वनाच्वंबलय् दकलय् तःधंम्ह पुजाहारीया भ्वाति छम्ह अन वल।

67 मि पना च्वंम्ह पन्नुसयात खनाः बांलाक स्वयाः वयात थथे धाल – “छु नं नासरतय् च्वंम्ह येशू नाप जुइम्ह खः।”

68 पन्नुसं ख हे मखु धकाः थथे धाल – “जिं ला वयात म्हमस्यू। छं धयाच्वंगु खँ नं मथ्।” थुलि धयाः व लुखां पिने वन। अले खा हाल।

69 भ्वातिनं वयात खनाः लिक्क दनाच्चंपिन्त धाल – “थ्व नं इपि नाप जुयाच्चंम्ह खः।”

70 हानं वं मखु धकाः धाल।

भचा लिपा अन दना च्वंपिन्सं वयात धाल – “धात्थे छं नं इपि नाप जुयाच्चंम्ह खः, छं नं छम्ह गालीली खः नि।”

71 वं पाफयाः धाल – “छिमिसं धया च्वंम्ह मनूयात ला जिं म्ह हे मस्यु।”

72 अबलय् हे खा हाल। थ्वनापं खा हाःगु निकः जुल।

अले येशू वयात धयादीगु थ्व खँ लुमंकल – “निकः खा हाले न्ह्यः छं जितः स्वकः म्हमस्यु धकाः धाइ।” थ्व खँ लुममं हे व ह्यँय्ह्यँय् ख्वल।

15

पिलातसया न्ह्यःने येशू

मन्ती २७:१-२, ११-१४; लूक २३:१-५; यूह १८:२८-३८

1 कन्हय् खुन्हु सुथ न्हापां हे तःधंपि पुजाहारीत, थकालिपि व शास्त्रीतय्सं सल्लाह यानाः येशूयात चिनायंकाः पिलातसयात लःल्हाना बिल।

2 वं येशूयाके न्यन – “यहदीतय् जुजु छ हे खः ला?”

वयकलं लिसः बियादिल – “छिं थःम्हं हे धयादिल।”

3 वयकलं यक्व मखुगु खँ ल्हात धकाः तःधंपि पुजाहारीतय्सं वयकःयात पाः यात।

4 हानं पिलातसं न्यन – “छं छुं नं धायेगु मदु ला? इमिसं गुलिमछि खँय् छन्त पाः यानाच्चन।”

5 अयनं वयकलं छुं हे धयामदी। थ्व खनाः पिलातस अजू चाल।

येशूयात स्यायेगु फैसला याःगु

मन्ती २७:१५-२६; लूक २३:१३-२५; यूह १८:३९-१९:१६

6 छुत्काराया नखःबलय् यहदीतय्सं पवंम्ह छम्ह कैदीयात त्वःतेगु चलन पिलातसं यानातःगु दु।

7 अबलय् ज्वनाः कुनातःम्ह बरब्बा धाःम्ह छम्ह मनू दु। बिद्रोहया इलय् मनू स्याःगुलि वयात इयालखानाय् कुना तःगु खः।

8 न्ह्याबले नखःबलय् छम्ह कैदीयात त्वःतेगु यानातःगुलि मनूतय्सं अबलय् नं छम्हयसित त्वःताब्यु धकाः पवं वन।

9 अले पिलातसं इमिके न्यन – “यहदीतय् जुजुयात त्वःता ब्यूसा छिमित यः ला?”

10 तःधंपि पुजाहारीतयसं वय्कःयात स्वये मफयाः ज्वंकूगु खः धकाः वं स्यू।

11 अले ला तःधंपि पुजाहारीतयसं मनूतयत ग्वाकाः वय्कःयागु पलेसा बरब्बायात त्वःताब्यु धकाः धाय्कल।

12 वं इमित धाल – “अय्सा छिमिसं यहदीतय् जुजु धकाः धाःमहयसित छु यायेगु लय?”

13 इपि फुक्कसिनं हालाः धाल – “वयात कूसय् यख्खानाब्यु।”

14 वं इमित धाल – “छाय् वं अपायसकं स्याये मायेक छु याःगु दु?”

इपि झन जक चिल्लायदंक हाला हल – “वयात कूसय् यख्खानाब्यु।”

15 इपि थथे हालाच्चंगुलिं मनूतयत लयतायकेत पिलातसं बरब्बा धाःमह मनूयात त्वःताबिल। येशूयात दायाः कूसय् यख्खाना स्याके छवल।

सिपाइँतयसं येशूयात गिजय् याःगु

मन्ती २७:२७-३१; यूह १९:१-३

16 अले सिपाइँतयसं वय्कःयात दरबारया चुकय् यंकल। अन फुक्क सिपाइँतयत सःताः मुंकल।

17 वय्कःयात जुजुयात थें ह्याउँगु वसतं पुंकाः कंयागु श्रीपेच दयकाः छेनय् पुइकाबिल।

18 थुलि याये धुंकाः इमिसं वय्कःयात थथे धाधां हाय्कल – “यहदीतय् जुजुया जय जुइमा।”

19 न्हायपं कथिं छेनय् दायाः थुकलं बियाः इमिसं वय्कःयात भागि यात।

20 थुकथं इमिसं वय्कःयात गिजय् याये फक्व याये धुंकाः ह्याउँगु वसः त्वकाः न्हापायागु तुं वसतं पुंका बिल। अले वय्कःयात कूसय् यख्खायेत यंकल।

येशूयात कूसय् यख्खाःगु

मन्ती २७:३२-४४; लूक २३:२६-४३; यूह १९:१७-२७

21 कुरेनी वःमह अलेक्जेन्डर व रूफसया अबु सिमोनयात इमिसं लँय् नापलात। अले इमिसं वयात कर कर यानाः येशूयागु कूस क्वबिकल।*

22 थुकथं इमिसं वय्कःयात गलगथा धाःगु थासय् हल। गलगथायागु अर्थ खप्परे धाःगु थाय् खः।

* 15:21 १५:२१ रोम १६:१३

23 अन थ्यंकाः इमिसं वय्कःयात स्याःमचाइगु मूर् वसः ल्वाकछ्यानातःगु दाखमघ त्वनेत बिल, वय्कलं व त्वना मदी।

24 थथे वय्कःयात कूसय् यख्खानाबिल। अले चिष्टा तयाः इमिसं वय्कःयागु वसः इना काल।*☆

25 वय्कःयात कूसय् यख्खाःबलय् सुथसिया नौ बजे जुल।

26 वय्कःयात पाः यानाः थथे च्वयाः कूसय् तानाबिल – “यह्दीतय् जुजु।”

27 उबलय् हे इमिसं वय्कःयागु जवंखवं निम्ह दाख्खंतयत् नं यख्खायाबिल।

28 थुकथं धर्मशास्त्रय् च्वयातःगु खँ पूवन – “वय्कःयात अपराधीत लिसे ल्याः खात।”*☆

29 व लँय् जूपि फुक्कसिनं छ्यं क्वातु क्वानाः वय्कःयात गिजय् यानाः थथे धाल – “देगः थुनाः स्वन्हं हे देने फु धाःम्ह छ हे मखु ला?*

30 आः कूसं क्वहां वयाः थःत बचय् याये फु ला?”

31 अथे हे तःधपि पुजाहारीतय्सं नं शास्त्रीत लिसे थथे खँ ल्हानाः वय्कःयात गिजय् यात – “वं मेपिन्त ला बचय् यात, थःत धाःसा बचय् याये मफुत।

32 इस्त्राएलीतय् जुजु, अले मुक्ति बीम्ह ख्रीष्ट खः धयागु जूसा कूसं क्वहां वयाः क्यँ। अले जिमिसं विश्वास याये।” वय्कः नाप कूसय् यख्खाया तःपिन्सं नं वय्कःयात गिजय् यात।

येशू सीगु

मन्ती २७:४५-५६; लूक २३:४४-४९; यूह १९:२८-३०

33 अबलय् न्हिनय् बाह् बजेनिसें तीन बजे तक सारा संसार हे खिउँसे च्वना वन।

34 तीन बजेपाखे येशू थथे धकाः तसकं हाला हल – “इलोई-इलोई लामा सबखथनी।” थुकियागु अर्थ – “जिमि परमेश्वर, जिमि परमेश्वर, छिं जितः छाया त्वःतादिया?”*☆

35 थ्व न्यनाः अन दनाच्वंपि मनूतय्सं थथे धाल – “वं ला एलियायात सःता च्वन।”

36 छम्हय्सिनं कापः हिनातःगु कथि कयाः ब्वाँय वनाः पाउँसे च्वंगु दाखमघ थुनाः हल, अले वय्कःया म्हुतुइ ल्वसुकाबिल। अले वं धाल – “स्वये, एलिया वयाः वयात क्वकाः वइ ला मवइ।”*☆

37 येशू छकः तसकं हालादिल, अले प्राण त्वःतादिल।

☆ 15:24 १५:२४ भज २२:१८ ☆ 15:28 १५:२८ यशै ५३:१२ ☆ 15:29 १५:२९ भज २२:७; १०९:२५; मर्क १४:५८; यूह २:१९ ☆ 15:34 १५:३४ भज २२:१ ☆ 15:36 १५:३६ भज ६९:२१

38 अबलय् हे देगलय् च्वंगु पर्दा च्वनिसें क्वथयंक निकू दलाः गुना वन।☆

39 थथे वय्कः सीगु खनाः न्ह्यःनेसं दनाः वय्कःयात स्वया च्वंम्ह छम्ह कप्तानं धाल — “धात्थें हे व ला परमेश्वरया काय् खः।”

40 मिसातय्सं नं तापाकं स्वयाच्वंगु दु। इपिं मध्ये मरियम मगदलिनी, चिधीम्ह काय् याकूब व योसेफया मां मरियम व सलोमीपिं नं खः।

41 थुपिं येशू गालीलिय् दीबलय् वय्कः नाप जुयाः वय्कःयात ग्वाहालि याःपि मिसात खः। वय्कः नाप यरूशलेमय् वःपि मेपिं यक्व मिसात नं अन स्वयाच्वंगु दु।☆

येशूयात चिहानय् तःगु

मती २७:५७-६१; लूक २३:५०-५६; यूह १९:३८-४२

42 विश्रामबार छन्हु न्ह्यः विश्रामबारायात माःगु ज्वरय् यायेगु दि बहनी मज्जनिबलय्

43 अरिमथिया धाःगु थासय् च्वंम्ह योसेफ पिलातसयाथाय् वन। थ्व फुक्कसिनं हनातःम्ह सभाय् च्वंम्ह सल्लाह बीम्ह मनू खः। थ्व नं परमेश्वरयागु राज्य वइतिनि धकाः आशा यानाच्वंम्ह खः। अबलय् वं मग्यासे पिलातसयाथाय् वनाः येशूयागु सीम्ह प्वं वन।

44 येशू सी धुंकल धयागु खँ न्यनाः पिलातस छक्क जुल। वं कप्तानयात सःताः सी धुंकूगु खः ला कि मखु धकाः न्यन।

45 कप्तानं “सी धुंकल” धकाः धाःगुलि योसेफयात सीम्ह यंकि धकाः धाल।

46 अले वं भिगु सुतीकापः न्याना हयाः सीम्ह येशूयात क्वकयाः कापतं हिनाबिल। अले पहाड ह्खनाः दय्कातःगु चिहानय् यंकाः तयाबिल। थुलि यानाः छगः तग्वःगु ल्वहं गुलु तुइकाः चिहानया प्वाः तिनाबिल।

47 मरियम मगदलिनी व योसेफया मां मरियमं थथे सीम्ह तःगु स्वयाच्वन।

16

येशू म्वानावःगु

मती २८:१-८; लूक २४:१-१३; यूह २०:१-१०

1 विश्रामबार वने धुंकाः मरियम मगदलिनी, याकूबया मां मरियम व सलोमीपिं मिलय् जुयाः सीम्हय् इलेत वासः न्याः वन।

2 आइतबार खुन्हु, सुथ न्हापां निभा: त्वयेवं इपिं चिहानय् स्व:वन।

3 इपिं लँय् थथे हा हां वन – “प्वा: तिनात:गु ल्वहं सुनां चीका बीगु जुइ?”

4 थथे हा हां इमिसं उखेपाखे थस्व:बलय् तग्व:गु ल्वहं चीकात:गु खन।

5 चिहानय् दुहां वना: स्व:बलय् अन तुयुगु वसतं पुना च्वंमह मनू छमह जवय्पाखे दनाच्वंगु खना: इपिं अजू चाल।

6 वं इमित धाल – “ग्याये मते। छिपिं कूसय् यख्खानात:मह नासरतयाम्ह येशूयात स्व:वयाच्वनागु मखु ला? वय्क: ला थन मदी। वय्क: म्वाना वये धुंकल। स्व, थ्व हे थासय् मखु ला, इमिसं वय्क:यागु सीमह तयात:गु?

7 आ: वना: छिमिसं चेलातयत् व पन्नसयात थथे धयाब्यु – ‘वय्क: छिपिं स्वया: न्हापां गालीलिय् थ्यंकादी। वय्कलं धयादी थें छिमिसं वय्क:यात अन हे खनी।’ ”✧

8 थ्व न्यनेवं इपिं ग्याना: व अजू चाया: चिहानं बिस्सुं वन। थ्व खँ इमिसं सुयातं मकं, छायाधा:सा इपिं तसकं ग्यात।

9 येशू सिना: हानं म्वाना झाये धुंका: आइतबार सुथ न्हापां मरियम मग्दलिनीयाथाय् खनेदत। वय्कलं थ्व हे मरियमयागु महं न्हय्मह भूततयत् पिछवयादीगु ख:।*

10 वं वना: नुग: मळिंका: ख्वया च्वपिं येशूया चेलातयत् थ्व खँ कन।

11 म्वाना झा:मह येशूयात वं खन धका: धा:गु खँय् इमिसं विश्वास मया:।

12 थनंलिपा इपिं मध्ये निमह चेला गामय् वनाच्वंबलय् वय्क: मेगु हे रूप कया: इमिगु न्हा:ने खनेदयक: झाल।

13 थुमिसं नं वया: मेपिं चेलातयत् थ्व खँ कन। थुमिगु खँय् नं इमिसं विश्वास मया:।

14 लिपा झिंछमह चेलातय् नयाच्वंबलय् येशू इमिथाय् झाया: इमिसं विश्वास मया:गु व इमिगु नुग: छा:गुलि ब्व:बियादिल, छायाधा:सा वय्क: म्वाना झाये धुंका: वय्क:यात खंपिन्सं धा: व:गु खँय् इमिसं विश्वास मया:।

15 अले इमित धयादिल – “सारा संसारय् वना: छिमिसं फुक्क मनूतयत् भिंगु खँ न्यकि।✧

16 विश्वास याना: बप्तिस्मा का:मह बचय् जुइ, विश्वास मया:पिं दोषी ठहरय् जुइ।

✧ 16:7 १६:७ मती २६:३२; मर्क १४:२८

* 16:9 १६:९ गुलि गुलि हस्तलिपिइ मर्क १६:९-२० मद्दु

✧ 16:15 १६:१५ प्रे १:८

17 जितः विश्वास याःपिन्के थ्व चिं दइ – जिगु नामं इमिसं भूततयत् पितिनाछवइ, न्ह न्हगु भाषां नवाइ,

18 सर्पयात ज्वनी, छुं जुयाः बिख हे त्वंसां इपिं सी मखु, उसाँय् मदुपिनिगु छैनय् ल्हाः तयाः ल्वय् लायकाबी।”

19 थथे इपिं नाप खँ ल्हाये धुंकाः प्रभु येशूयात स्वर्गय् थत यंकल। अले वय्कः परमेश्वरयागु जवय् च्वनादिल।*

20 लिपा चेलातयसं फुक्कभनं वनाः भिंगु खँ न्यंकाजुल। प्रभु थः नं इपिं नाप जुयाः इमिगु ज्याय् ग्वाहालि यानादिल। अजू चायापुगु चिं क्यनाः इमिसं न्यंकाजुगु खँयागु दसि बियादिल। आमेन।

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7